

ANGNI RINGANIRANG

B.S. BANGSHALL

ANGNI RINGANIRANG

B.S. BANGSHALL

Rs. 50.00

Segimin Katta-bichongrang

| | | |
|-----|-------------------------------|----|
| 1. | Tura Jilla | 1 |
| 2. | Saksa Sakgni | 11 |
| 3. | Simsang | 12 |
| 4. | Bol..... | 16 |
| 5. | Ama | 18 |
| 6. | Ka·saani Nok | 19 |
| 7. | Bewaltang | 20 |
| 8. | Chimongmano | 20 |
| 9. | Japinapa | 21 |
| 10. | Anga Bi·sa | 21 |
| 11. | Re·ba P'·lakan Re·ba | 22 |
| 12. | Rasong On·na Salsa..... | 23 |
| 13. | Galatbo Dukrangko | 25 |
| 14. | An·ching Mitelna..... | 27 |
| 15. | On·atenga Salamko | 27 |
| 16. | Robo An·senge Songtango | 28 |
| 17. | A·chikrangna | 29 |
| 18. | Sakantian A·chik Jatna..... | 30 |
| 19. | Nitogipa 'Song | 33 |
| 20. | Ching A·chik A·song | 34 |
| 21. | O, Ang A·chik A·song..... | 35 |
| 22. | Nang·na A·chik A·song | 36 |
| 23. | Chingni Dongram | 38 |
| 24. | A·chik A·bri | 39 |
| 25. | Song Chel·ao..... | 40 |
| 26. | Ku·rangtangchi..... | 41 |

| | | |
|-----|-------------------------------------|----|
| 27. | Okamenga Pilakko | 42 |
| 28. | Dukrangko Amtoke (27-06-1964) | 43 |
| 29. | Jagring Teng-surikgen | 44 |
| 30. | Pattigimin Rasong | 45 |
| 31. | Ritimkari..... | 46 |
| 32. | Ekangani | 49 |
| 33. | Karitangna Bils Sokon..... | 52 |
| 34. | Gokarek-gok | 53 |
| 35. | Gachioba An-senga | 55 |
| 36. | Dongode Ang Baksa..... | 56 |
| 37. | Dongode Un Baksa..... | 56 |
| 38. | Re-ba P'lak Nomil-Panterang | 57 |
| 39. | Ring-choe Saksanjok | 58 |
| 40. | Ohoma | 60 |
| 41. | Gogaiwai, Gosaiwai, Direngwai | 61 |
| 42. | Salsamangmang An-sengna | 62 |
| 43. | Sikatang | 63 |
| 44. | Mikkangtango gita | 64 |
| 45. | Saksan Sikdikdik | 65 |
| 46. | Jarani Kore Doka..... | 67 |
| 47. | Cha-asia ("Ritimkari" | 69 |

poedooniko ra-ongkatgimin)

JANAPANI

Ian baksa anga an·tangni sechimonggimin ku·maraprangko ba poedo-rangko “ Angni Ring·anirang” ine minge chapa-ka-e nakatatenga. Ring·anirang ine minga, maina iano segimin-rangoni bang·akon sul·hikote ba badiaba sulrangna ma·keatesa seaha; aro jerangnan sul-on·jaha indakgiparangkoa ku·marap mingtona gitasa seaha.

Indiba iano segiminrang gimikkon ku·marap ba poedo gita seahani gimin, sul gnanggipa ong·oba ba ong·jaoba, seani miksonganiko pilakan ma·sigen, maina bang·bata seanirangon jakkalronggimal A·chik kattarangkosa jakkalaha. Indiba gisikni aro skiani mangsonganiko ma·sina nanggniba dongkugen.

Iano nakatenggipa ku·maraprang, a·songtangni, songsarni, toromni, gisikni, ka·saani, A·chik-chrokmesaani aro gipin gipin chanchiani bidingo sechimonggiminrang ong·a. Haida, uarang sanaba sanaba me·sugen aro sanaba me·sujawa; mande sakantini kaman indaken ong·a. Manderangsa bichalgen.

Tura, July, 1967
B S. Bangshall

Published by Mrs. Sunilla G. Momin, W/o Lt. B S. Bangshall
Financed by Department of Arts and Culture, Shillong, Meghalaya

Dedicated to

Lt. Bettino G. Momin
Lt. Billyno G. Momin
Lt. Ben Carlo G. Momin

TURA JILLA

1. Dura 'bri A·chik mikkim
Chenggontaltal simdim simdim,
Dura Nokrek a·biding,
Peng·pat·suet gongding-ding;
Sakchi aram pa·chapchap,
Guuri mrik ja·chapchap;
Songreango songdu chijol
Nikwatenga kosak joljol.
2. Dura 'bri kimbe ta·srī-
'Bri kosakon balwa balsri,
Uni ja·pa ja·reko,
Ga·nangpaja biapo,
Makkre bondan' roramo,
Songjok A·chik jilako
Biming minge Tura-ko,
Silpajaoba mingsinga,
Jatko mikgaoatchenga.
3. Chengo skang chasongni,
Manda Simsang chijolni,
Chatro ku·simangtingrang,
Nomil rongrong-silsilrang,
Lekka skitokchengainja·on,
Isol torom rikchenga Tura-on.
4. Bilsi sokon chengode,
Skul chuti ong·ode,
Gingsirippangtokaijok

Songchi re·na inode;
“Me·gong baljok an·sengjok
Songtangtangchi re·panok.”
Ine ring·angjokode
Beng·o-kangon man·jajok,
Chatrirangba ja·chapchap,
Nirikoan nikjajok.

5. Chengo unomitingde,
Songadamni mandede,
Tura-chini inode,
Chatro-chatrirangkode,
Mande ra·sotokbea,
Chatimole nibeas:
Duti-chadol bokako
Teng·supile nikana,
Kini rama chitara
Do·pa chiring gandana.
A·chik torom rikchengram Tura
Ma·-pagitcham skiram jilla.
6. Jilla-nokap o·daldal
Saheb-suba a·gital,
Mande nokba jelkuja
Bangal-Rori sokkuja;
Jilla buring bolgrimgrim,
Si·indikdik ka·sinjrim,
Do·o-matni ku·rangni jikjakan
Bolrikeo amakrang pen·panpan;
Chandmari, Tura bajar Hawakana-ba
Tura Mission a·damba, Katcharini nokapba,
Da·o gita ong·kuja,

Chengmangmangaipitichim;
Biap-bicham minkuja
A·dal pe·a gandachim.
Ja·manosa jelbajok,
Mande nokba bing·bajok.
Bangal-Rori sokbajok,
Songdong a·chatokejok-
A·chik 'songni jillao
An·ching baksa Tura-o !

7. Unormiting chasongde
Gisik an·saotokbea,
Cholon-rokom bewalrang
Ma·gap-ma·gap nambea:
Rori gita duti gane kitap jakbitange,
Skitoka-poraitoka chatroranga krenge.
Bengali-ni oikor-rangchi A·chikkuko sea
Un baksa Engraji ku·koba skia.
Normal skul matchotede u'mang poraitoka,
Unikoa 'master'ni kamko am·e ka·a.
Gisik wa·satokbea, nio mikkim chabea,
Skiani bang·pajaoba lekka-pora man·bea.
Cha gitchak gisep gisep toka gita ringa,
Cha-daka chinirara ka·sitange chi·a.
Chatriranga riking bangsi dakmandako gana,
Chadol chine, to nonge kini rama chita-
Chasong giticham chatrirang,
A·chik ama-ambirang!

8. Mankachor sorokchipak donga Hawakana,
Dak bangala kosakchiko minga Babupara;
Chatrirangni dongramoni sakachina kingking,

Ringre chiring samsajoljol Chandmari a-ding:
 Niwattoa rona nama balwa pangsang-pangsang,
 Gandrak chiring nalsachipak gittimde Wadanang.
 Kosakchipak dika bata buring il-gim-il-gim,
 Ringre chiring jakasichi donga Ringre gittim.
 Sanram nok ge-sakode minga Kala-ajar,
 Dalu sorok an-pachake donga Nakam bajar.
 Biming minga uamangde
 Bang-a gitim nokapde,
 Jilla buring gisepo dongoba,
 Chonmangmanga ong-jasa Tura-ba.

9. Tura jilla antikode Sonibalo cha-a,
 Warekdimdim jikjak-jikjak bang-an mande soka;
 Ajong, Rori, Bangal, Nepal aro A-chik mande
 Anti cha-a napsepsepe bang-a nomil-pante.
 Da-nang gose A-chikrangde samjak-bijakkosa,
 Pala gal-da, me-cheng, baring aro me-jakkosa.
 Palo palo nangjaode gale katangaijok,
 Indinari manderangsa ga-belbele galjok.
 Ba-ra-kancha, cha-chini, to-sabonrangko,
 Indioba Bangal-Rori pala dokanrango.
 Tangka mona suake Rorirangsa badinga,
 Dokan ate asonge cha-e bikma dal-onga.
 A-chikrang-ni a songo,
 An-ching Tura jillao.
10. Chi nama manchakode aiao maiko jegen,
 Nikpagijagiparangde “bebemasai” ingen;
 Sapporiri grikjangjang chiringni chi joka,
 Mikka jakra wachengosa kimongdildil daka.
 Chianingni chikoba siltong teke suala,

Dimchang a·chang banoba siltong sokna guala.
 Balroroni salode, balsalakmitingode,
 Sala ko·rang rakana chiring ran·changjokode;
 China ma·brangtokbea, me·chik·desa neng·bea,
 Basing dokpingpingari chasekseke am·bea.
 Siltong chi·tekramo mande soka bakdapdap,
 Basing, me·dik·sam·dikrang rikking·rikkang
 dandakdak;
 Manggisiko nikana sogin timola gita,
 Samjanggiko kanatna seksektokenga gita.
 Ding·olana atamchipak re·angoba auna,
 Asongtime sengtimani ajamkuakpil·a.
 Joka Ringre ringrote,
 Tura jilla ma·ate!

11. Nokantian Nokaptango Ki·gong jamgop pintoka,
 Mandeska mandesa toka gita galoka.
 Pring salchukalosa galokgipa sokbara,
 Moelako toktoke ki·gong samo galbara
 Unomiting manchade dimak sengdobagen,
 Gingting rim·tip·rim·tipe bi·sa·desa chaksogen.
 Pringni ua somoion goalaba sokbagen,
 Dingdet·dingdet baltinko ripeesa palbagen;
 “Tika·paltu” palronga goalarang sekseke,
 A·chang·dimchang biapo chigittangko rudape.
 Naba tol·a inode sing·e nibo ui·gen,
 Badiaba chipakde ong·bebea indaken-
 Chingni Tura jillao
 A·chikrangni songjinmao!

12. Jilla nokap ‘bri sako songdu chijol nikwata,
 Dapbek·chiwek dakpaja, sara·nokra a·sata.

Bate rotobatgenchim rama minikjangode,
Sorok pekwatgiparang Tura jilla ma-ate;
A·kong a·dap chirama bi·sa·desa re·toja,
Chiring noksik batsotram rama ga·battopaja.
Mikka jime waode chiring chikol ta·raka,
Da·nang mitam bi·sako rengbong rengbong balpaka.

13. Songjinmani manderang atam balwa ringronga;
Chandmari sorokko warekdimdim weronga-
Do·o bilbaa gita motor gari deldikdik,
Re·baode sorokko katna nangjok rang·gitik:
 Sorok a·dam gitchete wate katna nangaha,
 Bi·sa·desa jagoke a·sam bame chakaha.
Sorok bimong jatchio badiaba jolode,
Ring·chona nampila mikka jime waode:-
 Jutarangko okgalesa uko re·na nanggan,
 Ba·ra·kancha kikdoesa sosichopchop batgen.

14. Sorok a·dram guarerang badiaba chua,
Sanibani matchurangde ga·akone sia.
 Sonibalni salode, bajar ramachipakde,
 A·pal re·an dandakdak seengchipa dimakmak;
Gingting rumal rim·tipe re·pakgipararasa,
Maiba soenga gita ku·songdodo dakesa.
 Jilla nokap kosako,
 Ga·nangpaja biapo;
 Rogimale ronapa
 Chingni Tura Jillao!

15. Nokap·biap kangtoka a·ba o·pata gita,
Nigamatariode a·chang gita nikata.

Buring dimchang inemung saoba
 sing-rokjokode,
 Amikani nokapsa inataijok seng-sote.
 Skang mande gitchamrang nokap-bari o·toka,
 Man·atangtang sikatang bang-e-bang-e kangtoka.
 A·ding a·patalosa A·chikrangde dongtoka,
 A·dap soroksamkosa Bangal-Rori sekseka.
 Man·atoktok cha·atok a·ding balwa ringari,
 A·chikrangde raktoka bijak na·kam cha·ari
 Nokking bing·tiptipode balwa ringna man·jawa,
 Uko chanchiatode jilla gipin sokjawa;
 A·chikrangni jillako
 Biap balwa namako.

16. Manden' man-e cha·ako nokan-jaman paraka
 A·song sila-siljako ramarangchi pinika.
 Rama sorok mitamko bijolichi ching·ata
 Teng·rakjaoba mesokna sandiode nikata.
 Sorok pekwatgiparang Tura jilla jatchio
 Andalenga mitamrang jajong jabitchimao,
 Kana dikdaka gita badiaba jolrango,
 Bari bolgrim andalsim rama noksik gonggeo;
 Nokjatchio so·gipa chakki dimela gita
 Jrangchipe nikpaja tochi ran·changa gita.
 'Bri kosako rikgipa jilla,
 Jeba ong·bo Bimingde dal·a!
17. A·sel nange kamchonjok Chandmari dokanrang,
 Wal·sareo gimajok pilak gam·jinrang,
 Maming ong·ja indiba skangnade nambate,
 Sengdoatjok nakrangko riting riting ma·ate;

A·belati ginchichi repidape rakata,
Songdogimin nokrangko apsan minikjangata.
Jolsa gol·torakosa nokantian jakkala,
Miktorachi toesa kuturiko suala.

Aro nitobatgenchim noksam rongtalbatode,
Apsan rokom gandingko ‘dokandarrang ganode.
A·chikrangni songjinmao,
Tura-Chandmario.

18. Tura jillao dongpara gisep balwa ringpana,
‘Parade’-kana, ‘Tura Park’ aro Hawakhana.
Skan ghasong gitthamo ‘Tura Park’ko mingsinga,
Atam balwa ringpana chatro-chatri jinronga:
Na·tok gitthak kongtokrangko pokkriosa jila,
Riting riting nitoriri bibalrangba bala.
Samsirangba tangsekgilgil nina nitobea,
Roram biap gisep gisep boldim mojimbea.
Boldimrangni mitamrangde da·o ma·piltokjok,
Ja·pangosa salakimna ding·kario rojok.

19. Indioba da·ororo aro mingsa donga,
Andalmindik do·ki-dangdik nokningosa roa;
Atamantin mande jinma ‘jawilwat’-ko nia,
Noksa-jagring jipjangako nina paisa on·a;
Balwa ringa nokningosa gijip wilwilate,
Chakna nanga ki·sioba gingtingko rim·tipe.
Dongna nanga iarangba Tura jilla ma·ate,
Un baksa roram bari nitoriri dongode,
An·sengramrang Tura-o,
A·chikrangni jillao

20. Pringode niriktokbo chatro-chatri jinmako,
Re·angako skulchina Chandmari sorokko-

lling-illap balbring bring chadol paksuete,
 Gitcak-ripet gane-chine mitam ku-chimite;
 lekka-kitap jakbitange, jako chatta ra·e,
 Seng·su seng·su, man·su-man·su mitam beri ringe,
 Re·angtoka jikjak-jikjak rama sorok joljol,
 Kenmangija jakgitele ong·ja gisik nokkol.
 A·brin' dedrang ma·ate, nama da·nang namade,
 Un baksa lekka-bida gisik seng·paode.

21. "Tura Peak'-chi 'picnic' cha·na umang re·angronga
 Sike-moe, doke-dame an·sengangtokbea;
 Mongsongbate matchotmano bilsin' porikako,
 Songtangtangchi ekgriktokna tom·an ja·mano.
 Gingsi ripang, balwa pang·sang kusi ong·tokbea
 Do·jinma jaksa ganda gisik an·saobe.
 Porikkani biterangko kinaatjokosa,
 Simsakjae dukko man·a mitamrang unosa.
22. Ganding-chinding, mikang-bimang chasong rikna
 namjok,
 Indioba mikchikkima bewalrang sokjajok.
 Miksongani nisantangko bang·an jaktuatjok,
 Balbojengjeng, ritcheng ritcheng poraitokarijok.
 Tura jilla skulni chatro-chatrirang,
 Chasongrikrik chasongna mikkanggiparang;
 Poraitoka Tura-o
 A·chikrangni jillao!
23. Songjinmani manderangde dal·a chona donga,
 Rokom rokom, dingtang dingtang kamrangko ka·a;
 A·chik ripeng me·aparang ku·mong-nanggrimbea
 Torom kamna, songsar dilna gisik nangtokbea.

Sokachakna alnamako maikomancha jegen,
 Gipin jatrang nikeode aiao inmanpilgen.
 Dikdik ropakangoba on·gen gue·pankode,
 Asong-dengdengsrapgijan dakataigen chakode;
 Da·nang basakobasa nokni mande agangen,
 “Chini bon·jok” ineming babilsiko chipbagen.
 Noksul-songsul rogrikronga golpo-soppo ka·e,
 Ku·gep ku·gep ja·momoe gue moja cha·e.
 Donga dipet on·akode cha·simsimangaigen,
 Roa dipet ettalgrike golpo ka·angaigen;
 Mongsongbate mitamrang, da·nang ma·pagitchamrang,
 Watna-engna man·jaha, ma·pilgimin bewalrang.
 Songjinmani padotrang,
 Tura jillan’ A·chikrang!

24. Turan’ me·chikmarangkode aiao maiko jegen,
 Pilak kamon damsan damsan ku·mong nangrimtokgen.
 Dingtangmancha gilja ka·e namen an·saotoka,
 Kusi ong·e golpo ka·e tomdak tomdak roa.
 Salko minge ba·ra sikna dona dingtangmancha
 Sikna-kona skigipa chatrirang gitasa.
 Ba·ra chola sikkiminko dandak dandak pala,
 Nama-namja kingtalgiya chasekseke kola.
 Gisik nanga dakchakpana pilak nama kamo,
 Chanchienba jakgitele onatja rasongko;
 Indioba rasong batja bang·e noktangtango
 Manpajaode namatpana nokni bi·sarangko.
 Ja·pang ja·dil nama bitchil chagen nokningoni,
 Dal·ahaosa rasong chugen nokni ma·gipani.
 A·chik a·song gimikna,
 Tura jilla seng·atna.

25. Tura 'bri simdim simdim,
A·chik rasong, A·chik mikkim.
 'Bri kosakni seng·a gipchong,
 "A·chik" biming tangbangpachong
 Pagitchamni rasong,
 Chukan-dongkam chasong chasong.

SAKSA-SAKGNI

1. Rikoba rikrak,
Man·oba dandak
 Saksa sakgni-
Seng·oba wilwal,
Dal·oba bewal
 Salsa salgni:
Bu·sugrimo balasa
 Pulni bari pil·jawa,
A·sesamni dokreksa
 Bilsi rikit baljawa.
2. Songsonganti gimik
Rangkojaode bimik,
 Mikgaoatjaode-
Man·ja chasong rikkit
Gipatna a·gimik
 Bitchri jakepsade.
Sakantian satjaode
 Buring a·chasopilgen,
Salantian gamjaode
 Magnasa neng·aigen.

3. A·songna mopile,
Bikpile bawile,
Gisik nangjaskal;
Salanti sakanti
Maibako on·titi
Daksningjaskal.-
Saksa rasong chaariba
Ararana chagen:
Salsamangmang tangariba
Walon janggi galgen.

SIMSANG

1. Nokrek a·bri a·biding
Bisikoni gongdingding
Chima Simsang ta·dingding
Gonggeske ro·dingding-
Joka salni gipengchi
Songdu chirapakachi-
Darang a·rong a·sakchi
De·a-minga rasongchi.
2. Simsang chijolrangkosa
Gisik ra·a dikdiksa
Nikna gitik gitiksa
Mikjumango gitasa.
Saliramni ku·mango
Atam salni napango
Toka rongchi aramo
Ja·dil su·e chiningo.

3. Silang dare pattalrang,
Bisikoni chiringrang,
Mite tongte roramrang,
Chikol suripakarang-
Re-o salnik-janikja,
Salni ding-a nangsokja,
Chi-ripamchi ran-sokja,
Nirorona pa-sokja.
4. Mrik wari tu-arang,
Chirepani Nokaprang,
Cha-samkolni warirang,
Rangram rong-ma patalrang
Nion amang-gamangsa
Nikon riming-rimangsa
Mikjumango gitasa
Gisik ka-dangarisa.
5. Siju Do-bakkol ku-mang
Simsang rikam a-kuang,
Siriwilwil rong-kolrang
Napangode ka-suang.-
Songregipan nappakram,
Buga ranin jajokram,
Do-bak jiljal songdongram,
Na-bat mikdo dikdakram.
Kolning dringrang mitapa
Grimrang andalmitmata;
Chibol a-ning tangkama
Chi-indikdik kenmana.

6. Mingsinggipa Simsangchi
Chijol a·ning mitapchi,
A·ki gamchatgiparang,
Salnik-janikgijarang-
Chong·doari dongenga
Nana-nana dakenga-
Gisik a·ning bitgipa
Jawa matduatenga.
7. Simsang na·tok mingsinga
Chijolanti rim·ronga,
Na·rim-na·wak doronga
Jin·jok jin·jok roronga.
Simsang jolni A·chikrang
Chekpong doke rim·ronga,
Na·tok rim·rakgiparang
Walo na·wal nironga.
8. Antin' salo salode
Baghmara chijolde
Warekdimdim ninade
Bola-wa·a palade.
Ringko wa·chap dandakdak
Chirikamo rikrarak,
Rori wea jikjakjak
Mande soka wekwakwak.
9. Ringko chodochodoe,
Rori-malko chong·doe
Siju anti re·ronga
Chijolanti weronga-
Chikol dare jokako

Ta·ding chodoangari
Wari rilrakrikra
Ku·sim ka·dingangari.

10. Rompa-Rongdik chipecrang,
Dilsa a·bri ja·retrang,
Agrong Wari daparang,
Sapporiri an·chengrang,
Bandil bandil boldimrang,
Chio ring choarang
Na·tok wari bilarang,
Chikon gongding jokarang,
Nie rona nitoa,
Gingsiripang dodoa,
Nikmangmangon okkaa
An·senganin pekpila.
Simsang chijolrangkosa
Gisik ra·a dikdiksa,
Nikna gitik gitiksa
Mikjumango gitasa.

11. Tangka, sona gamsengrang,
Gun, mikkim, rasongrang;
Bipa, Chalang, matgrikrang,
Gisik wa·sagiparang –
Simsang chijol songdongram,
A·chik ‘songni mingsingram,
Chijol gittim A·chikni
Dingtang Patigipani.

12. Mingsing-minggamanirang,
Dongto·cha·toanirang,

Janggin katchaanirang,
 Biap nitoanirang -
 Nabagimin salrangna
 Ka·pak ka·pak nagenma ?
 Mikkang chasong salrangna
 Bate nabataigenma ?
 Simsang chijolrangoni
 Rasong jo·olanggenma ?
 Nama rasong A·chikni
 Da·o jaktuatgenma ?

Bol

1. Cheksi bijim bijak tangsim
 Nina tangsekgilgil,
 Ja·pang ka·sin simdim simdim
 Bolong, bolsal, bolsil.
 Basakoni bimik nae
 Bolma sokgalgaljok ?
 Badigita ja·dil su·e
 Kiro sike dal·jok ?

2. Basakoni rangkoenba
 Basakona tanggen,
 Badigita chasongrangko
 Aro nikangkugen ?
 Ama, apa, atchu, ambi
 Chasong gitcamrangko
 Ba·kujama uamangko
 Nang·ni pangma soko ?

3. Mande jatrangnaba skang
Nang·ko atchiama ?
A·gilsako bolni ja·pang
Ja·dil su·chengama ?
Karitangko dedagija
An·tangchin mesoka,
Changsamangba bitbatgija
A·sakna paraka.
4. Nitoriri bibal balan'
A·sakna chinani,
Chokchim chokchim bite nangan'
Janggina cha·ani
Bijak, bibal, kambe, rike
A·sakna ganani,
Ja·pang, cheksi, bibal, bite
Mandena on·ani.
5. Mingtasini sam-boloni
Pilak cha·anirang,
Rokomari jakkalan
Manden' dakgiminrang.
Tangka, sona, hira, mukta
Gamchatgiparangna,
Darangnaba na·an bata
A·gilsak dimdakna.
6. Manderangni janggi tanga
Aro gamchataba,
Tosusao sokna man·ja
Nang·ko indioba.

Dakgipan patijok ka·sae
Pilaknan a·sako,
Man·pachina jakgitele
Pilak nang·oniko.

7. Lekka sea, toka, nonga
Ang gita gokasa,
Indioba bolko daka
Dakgipa Isolsa.

AMA

1. Chongipa bi·sa ong·oba angara
Maina indita ka·sara amara ?
Bakgitchak odeko sok·kane aldua,
Ka·dingna changbao ka·bako dingdinga.
Angni tusio watgija nitima, '
Tusia mikrako gipake ku·dima;
Okkrie grapo cha·aniko on·a,
Tengtoe sakinao tugija sana.
2. Detang bi·sako maina amara
Chonbemitingo indita ka·sara?
Rajako gitasa detangko dal·nika,
Sonana bateba gamchate nika.
A·sak gimikna batpile angna
Amani ka·sara amjawa tona.
3. Sakgipin bi·sani cha·ako nike -
Chi·a-toako on·pana sike,
Mikchi rakjawa ama na·ara
On·pana man·jae detangna ka·sara ?

Detangna indake na·asan ka·saama
Sakgipin amade nang·ko sokjama ?
Sakgipin dedrangni dal·ako nike
Dal·atna sikama detangko bate ?

4. Chonengo amani ka·sara indake
Mesokja maina dal·mano gamchate ?
Dal·ahaon gokani gısıkde ui·ja
Basako gamchatgen amana sigija.

KA·SAANI NOK

Cha·togipa song·arang,
Similgipa bibarang,
Rongchinggipa bimangrang,
Ka·dingsmitanirang,
Kusi gnang mikkangrang,
Ka·saani ku·rangrang,
Katchagipa gisikrang,
Rinokgipa bewalrang.

Rongtalgipa nokdringrang,
Bokbegipa ba·rarang,
Knatogipa sulrang,
Nitogipa barirang,
Manigipa bi·sarang.

Iarangan nokdango,
Ka·srokate gisikko,
Nokni plak ma·drangko,
Galchaatgen ka·sao.

BEWALTANG

1. Buring a·jangchiode
Ganggu susam engenga,
Walba seng·na skangde
Seng·na andalsikchenga.
2. Bijakrangni mojimosa
Balwakode nikgen,
Balwa tom·tom ong·taiosa
Do·drang katchae ring·gen.
3. Andalmikmik mikka sime
A·sakna chijingen,
Ja·manosa ronggrikbate
A·sak ring·rangchipgen.

CHIMONGMAN·O

1. Biterang mikchepa
Bol·rike bijimao,
Jeldapchong·mota
Akchimongmano.
2. Srange nikoba,
Bitchri satmano,
Bing·aia indiba
Ma·pangmae dal·o.

JAPINAPA

Similgipa bibalrang balpongangon
Janggi an·gimik biban gapa;
A·gilsak dikdik gipake ku·dimon
Balwan' bimangsa japinapa.

ANGA BI·SA

1. Anga bi·sa chonenga,
A1·babaming dongenga,
Cha·na siko cha·enga,
Rona siko roenga.
2. Ama apa ka·sara
Jeko man·e on·para,
Ukon chu·ongnikpara,
Cha·na man·on okkara.
3. Maiba nambatakode
Cha·enggenma saobade-
Chanchipaja ukode
Anga bi·san' gisikde.
4. Angni ama apana-
Dal·batama u'mangna-
Saoba gipin dimdakna,
Changja uko chanchina.
5. Ba·ra gital namako
Saoba bi·sa ganode,
Chanchiman·a gisiko
Ma·na sike ukode.

6. Dongja dal·a chonani,
Mikneng- mikbugrikani;
Gisikode bi·sani
Rorimaia salanti.

7. Ai an·tangni kattako
Manijaode gisepo,
Maina doka Ai angko
Ka·sagija detangko ?

8. Kal·grikgija dongnapja,
Aide uko nam·nikja
Porainade aratja
Gisikosa chinapja.

9. O, anga indide,
Aini ge·etakode
Katta ra·gen da·ode
Kal·grikchina watode.

RE·BA, PLAKAN RE·BA

1. Hai, hai, me·tra-pante
Re·ba nisan de·e
Okamchimongna gita;
Apsan ja·ku de·na,
Uni Songko rikna
Kristian sipairang gita.

Re·ba, p'·lakan re·ba,
Jakjinma jak-on·na;
Ka·na, kamko ka·na
Uni Songnokko rikna.

2. Hai, hai, me·aparang,
Imbo me·chikmarang-
An·ching re·mikkangana;
Miksang-nangrimgrike,
Un rasongna krenge,
Ka·sroke kam ka?na.
3. Dukrang bang·beoba
An·ching bilnengoba
Ka·dong' Uan dakchakgen;
Kriston' Rasongona
Kristian kotok jinma,
Hai, ka·dongaibo chegen

RASONG ON·NA SALSA

1. Bilsi sokon chingna changsa
P'·lak a·sa'· jatrangna,
Gisik katchan' kusiin' salba
Nabaa p'·lak mandena.
 An·sengan sal changsa,
 A·gilsak dukoba:
 Rasong on·nan' salsa,
 On·na changpajaoba.

2. Gisik ka·sin ka·tongjrimjrim
 Chanchiani baksa,
 Ka·asuang mikchi jingjang
 Ka·tong moa pil·sa;
 Chanchion ia salko,
 Jisun' atchianiko;
 Gisik jriman' baksa
 Nabaa katchan' salba.

3. Mande nama ringrang jingjang
 Rongtalgipa me·trao,
 Gisik Rongtalgipan' Seng·a
 Teng·suenba Uno;
 Jokatgipa Gitel
 Atchijok Ua me·trao,
 Mande pil·e re·bae
 Ia a·gilsako.

4. Biap man·jae danang Uko
 Tuatjok chikongo,
 Atchichakna nitogija
 Matchuni gisolo.
 Gitelrangni Gitel
 Duk chake mesokjok,
 Papirangni a·sel
 Sichakna atchijok.

5. Salgin' sa·gre aganprakjok
 Teng·sudape ringrang,
 Uko knae dil·dil ong·jok
 Mes·nirikgiparang.

Katchaani kattako,
Jisun' atchianiko,
Jokatna pilakko
Uni re-baaniko.

6. Sa·grerangba dipjrodipjro
Salgin' gitko ring·e,
Bildoangjok aramsako
Uko teng·sudape.
 Olakkijok Uko
 Katchinikgiparang,
 Pilak a·gilsako
 Seng·gipa rajarang.

7. Kangal cholgri, bi·sa ma·gri
Aro rajarangba,
Ka·tong katchae kusi ong·a
Da·alde u'mangba
 A·sak mojingjange
 Kusi ong·an baksa
 Katchan' ku·rang sale
 Rasong on·na salsa.

GALATBO DUKRANGKO **(KRISMASNI GIT)**

1. Jajrenga skimarang, a·sakni dukrang,
Aro gisik' bal·jrimarang;
Ka·tongni marangrang aro p'lak paprang-
Galatbo u'rangko na'mang.

Galatbo p'lak nang' dukrangko
Pap marang namgijarangko;
Jokatna an-chingko p'lak papirangko
Atchijok Ua a·gilsako.

2. A·gilsak sripachim papni sagalo,
Janggirang andalaosachim;
Papni beri gnanng sitengtoachim,
Dongjachim janggi jokan chol.
Aiao maikai nambea chol!
Aiao maikai katchaan' katta-
Janggiko jokatna amgipa saksa
Atchiaha Jisu Bi·sa.

3. A·gilsako seng·a janggina naaha,
Man·jachim jekon pilakba;
Siani beriko dakgrike amaha,
An·chitangko on·chakenba.
A·gilsako seng·a naaha-
Seng·atna p'lak janggirangko:
Ka·dimean do·ga p'laknan oaha,
Hai, rasong on·na ia salo.

4. Dal·nikbo ia salko Un' atchianiko,
Ka·donge jokpana uchi;
Gale p'lak dukrangko Uni jakpongo
Ja·rikna Uko ja·manchi.
Hai, katchapana an·chingba,
Apsan gisik ka·dimena;
Dal·nike manina, rasongko on·na,
An·chingni Jokatgipana.

AN·CHING MITELNA

(Krismas)

Bilsi gimik tangana an·ching mitelna,
Man·jok an·ching ia salko changsa niktaina.
Katchatokna pilakan an·ching ia salo,
Cha·e ringe an·sengna an·ching da·alo;

1. A·sak mojingjangpile kusi ong'engo,
Gisik katchae ring'pana an·ching Krismas-o.
2. Dal·a chona pilaknan a·sak gimiko,
Miksongani mingsasan Jisun' atchiao.
3. Gisik katchae manina an·ching ia salko,
Salsamangmang guale a·sak dukrangko.
4. Jokatgipa an·ching atchian salo
Ka·sagrike manina an·ching Krismas-ko.
5. Dongpajaoba an·chingo gamseng on·pana,
Katchae ku·rang mitele rasongko on·na.

ON·ATENGA SALAMKO

1. Chanchiman·a saksano,
Donggenoba chel·beao
Ian baksa ka·sao
On·atenga salamko;
Dal·nikchina gisiko
Ia salsamangmangko.

2. Krismas nang·na namchina;
 Nokni ma·drang gimikna,
 Patiani ong·china ;
 Rasong Jokatgipana,
 A·gimikchi ring·china,
 Pilak manden' jatrangna
 Sian' beri chotchina.

ROBO ANSENGE SONGTANGO

1. Robo songtango, na·mang noktango,
 Katchae pangnan ka·tongtangtango;
 Ka·sagrikachi, bebe-dakachi,
 An·sengbo ma·drang noktangtango
 (Ring·taitaiani)
 Robo an·senge, na·mang songtango,
 Na·mang dukrangko ka·guale;
 Man·taijawaha a·gilsakode
 Na·mang noktango gitakode.
2. Nokni p'lak mdrang, dal·a·chonarang,
 Ka·sagrikna skibo na·simang;
 Nok an·sengbatgen ka·saa dongode
 Nagen katchaani janggin' salrang'.
3. Bakrima ripeng , noksul-songsulrang-
 Jongada ma·drang gita u'mang;
 O, mikaochimbo, manden' gisikrang,
 An·seng-baljokna p'lak A·chikrang.

4. An·senga a·song rona an·chingni;
Mingnama bımung knatoani,
Ong·genma a·songna nitoani
Dongjaode kamrang ka·saani?

- 5 Robo noktango, ma·drang an·senge,
Nok·namangchina sakantichi,
Robo songtango, pılakan katchae
Song an·sengchina na·simangchi.

A·CHIKRANGNA

1. A·chikni Ripeng, A·chikni Ripeng,
A·chikrangko okamkubo,
Ong·angkubo chasongna ripeng
Nang·ko rikna skikubo.

2. Ma·brangrikjok bano Pringprang
Andalenga teng·suatbo;
A·chikrangna changsamangmang
Askı gita nabataibo.

3. Da·nang Seng·baa najokchim changsa,
Seng·atna A·chik a·song-
Nabataikubo pringprang baksa
Chasongna seng·an rasong.

4. Chibisıkba ran·changama ?
Ka·singipa a·brin' chimik -
A·chikrangna joktaigenma
Sapporiri a·song gimik ?

5. Tangbang' A·chikna Ui·ani-
 Pangma gita bite nangbo;
 A·chikrangna mesokani
 A·gimikna gipe satbo.

6. A·chik Ku·rang, A·chik Ku·rang,
 Ku·tipgija mikotaibo;
 Ring·rakjaoba nang·ni bimang
 Ka·sirokrok ring·angtaibo.

7. Ring·ravgipa ong·bo na·a
 Gitok ran·changpile,
 Gapkamaebo ku·rangrara
 An·tang suakpile.

8. Ring·ang' ku·rang bikbopile
 A·chikna pangnajol,
 Ku·rangtangmung nikjapile
 Aram gisep joljol.

SAKANTIAN A·CHIK JATNA

1. Chakat' A·chik me·a-me·chik !
 Janggi grima il·lengtokbo;
 Miksontokbo pilak A·chik
 Gisik grima chanchitokbo.
 A·chik gimik sakantina,
 Sakantian A·chik jatna.

2. Chakat' Simsang bisikoni,
 Manda, Damring chijolrangba-
 Nokrek a·bri paksaoni
 Songdusamni A·chikrangba

An·pilbabo ku·mongrime,
Maibakode dakatpabo,
Gisik sokja inainabe
Tusiaoni simakbabo:-
A·chik gimik sakantina,
Sakantian A·chik jatna.

3. Chakat' bakbak, chakat' bakbak
Tusigipa jagipukal,
Okamenga mik kang ajak
Jachanggipa kratcha·kal.
A·chik gimik sakantina,
Sakantian A·chik jatna.
Mikgittalo ku·chakjaode
Jajumangchi jagokchina
Mandeska chakatjaode
Me·mangrangsa ku·chakchina:
A·chik gimik sakantina,
Sakantian A·chik jatna.

4. Nangol gongdang rim·gipaoni
Dal·a kamko ka·gipaona-
Kamtangtangchi an·tangtangni
Rikbo namgniko jatna.
A·chik gimik sakantina,
Sakantian A·chik jatna.

5. Nokni me·a-me·chik damsan
Detangtangni namgnina;
A·chik gimik ong·bo saksan
A·chik jatko dal·e rikna.
A·chik gisik sakantina,
Sakantian A·chik jatna.

6. Gisik nange nachil songbo
 Okamako chinapgipa ;
 Nama kamna miksongrimbo
 A·chik gisik seng·kalgipa.
 A·chik gimik sakantina,
 Sakantian A·chik jatna.

7. A·chik a·song gimik chipe
 Mingnamako bitchri satbo,
 Noksan gita ka·sagrike
 A·chik songko nokdang rikbo.
 A·chik gimik sakantina,
 Sakantian A·chik jatna.

8. Chakatbojok, chakatbojok,
 Chakchikanı chu·ongaha;
 A·chik ku·rang delpilengjok
 Knadike chakatboha.
 Sakantian an·tangtango
 Changsamangmang de·mesabo.

9. Buringgrimo okamoba
 Rong·kuchaksomanpilgnok,
 Ahao ku·rang jripahaoba
 Balwao bingbangrikpilgnok.
 Sakantian an·tangtangna
 Ku·chakboda A·chik jatna.

10. Chakat' A·chik pante –metra,
 Simildingding balgaotokbo;
 A·chik mukut mingna krakra
 A·chik gunko balpongatbo.

Pilak A·chik pante-metra,
Mikasalbo gisikrara.

11. Bibalrangko dima gita
Sa·gre-mite watnapjakal,
Teng·sugipa aski gita
A·chik 'songko nidoatkal.-
A·chik a·song rasongona,
Chasong rikit tangbangchina.

NITOGIPA 'SONG

1. Aiao, maikai an·senga A·chik 'song!
Chanchiaton gisikchi ka·srisri-
Aiao, da·nang nina nitoriri,
Aram pa·chap 'sakchi rikgipa 'song.
2. Aiao, maikai nitogipa 'songsa!
'Bri kosako chagipa sam-bolrang,
Aiao, damsas bari gita u'rang,
Mikchi nikon ka·paka gisikchi.
3. Nitoriri bibalrangni bala,
Ka·srokat chiringni gam·arang:
Knatoriri ring·a do·ni ku·rang.
Gisik katchan' dukrangko guala.
4. Aiao, ka·sri aram pa·chap balsri!
'Bri kosako an·senga pang·sangsang:
Rona nama gingsi ripang ripang,
Aram pa·chap 'bri kosak balsrisri.

5. Chonbeoba da nang chingni a·song,
Rimitchipchip nitoan' teng·suchong-
Seng·atchina pilak a·bri-a·kong,
Ching' A·chik 'song ong·china ching' rasong.
Aiao, nambea! Aiao nitoa! Aiao an·senga!
'Brirang' 'sako rikgimin A·chik 'song!

CHING' A·CHIK A·SONG

1. Ching' A·chik A·song ong·chong ching' rasong –
Gipgen nang' bimumg pilak a·bri a·kong;
Ring·gen p'lak do·drang, p'lak jatni dedrang,
P'lak 'brirangna knatori ku·rang.
Dongkugen chiring bolgrim jringjrotna,
Tipchanggija janggin' chimik chingna;
Ching' A·chik A·song ong·chong ching' rasong
Pangnajol ching' song teng·supachong.
2. Dilbo seng·ao chingni gisik bilko,
Pattibo ching' a·sak p'lak gisikko;
Mingatna nang' 'brin' rasong mikkimko
Chuatna ching' a·song chigako.
Krenga ching' dambe nang·ko de·atna,
Miksongani songtangko silatna;
On·bo ringna tipchanggija chimik,
Krengna 'songtangna ching' jat gimik.

3. Songdu 'kawe sagal rikamoni
Nikatgen seng·ako brin' sakoni-
Sikpachong changsao ong·pana apsan
Ong·pachong ching' song ge·sa nisan.
Hai, chakat' A·chik pante-me·trarang,
Gisik gital rikna p'lak damberang;
Man·kamjaskal ching' nama bimungko
Hai, krengna chuatna songtangko.

O, ANG' A·CHIK A·SONG

1. O, A'chik A·song,
Ka·sara ang' ka·tong,
Gamchatbea jatni rasong;
Jokgen nang·na mikchi
Chanchie gisikchi
Ama songna ang' ka·saachi.
2. Atchu ambin' roram
Ma·pagitcham siram,
Bipa matgrik panten grikram;
Ma·gitchamni bimik
A·chik dedrang gimik
Tipchangjachong ching' ka·san chimik.
3. Tangseka a·brirang,
Ka·sina chiringrang,
Slang dare rong·magrimrang;
Do·chelu do·kua
Ka·suang mikoa,
Matchok me·samrang chasong roa.

4. Donggenma banoba
A·kitik wenoba,
Nang·na bate nambatgipa;
Darang gıpın a·song
Batgenoba rasong –
Chipgenma jringjrot ka·san' ka·tong?
5. Ong·china mikasal
Burungni do·mesal –
A·chik songni gunni bibal;
Nang·na ka·san gisık
Tipchanggiya chimik
Jokang' ching' A·chik a·song gımık.
6. O, ang' A·chik A·song,
Teng·suchina chasong chasong:
Bimung mingsingatna
A·song balgaoatna
On·bo ching' Balbra pangnajolna.

NANG·NA A·CHIK A·SONG

1. Da·nang angnade –
A·songtango roani salde,
Ka·pak ka·pak chanchiatode,
Man·jawake gualnade
Atchıramtangkode.
Silpajaoba a·song
Biap a·bri a·kong,
Ong·kugenma chasong chasong

Nang·na nama rasong?
Ka·galama angni ka·tong
Nang·na A·chik A·song?

2. Basakobasa –
An·sengriri roan salosa,
Gamchatama angna dikdiksa,
Nang'rasongna mikbrapesa
Kratcha·genma pil·sa?
'Brirang ringrang ringrang
K'natori ku·rangrang,
Nitoriri sam·bibalrang
Grikbea chiringrang.
Atchiram songni ang' 'brirang
Janggin' ringanirang.

3. Atam balsrisri-
Sal napangon nina nitori,
Baritango saksan roari
Ka·sinjrimjrim ka·sariri
Gisik chanchiari.
'Brirang bo·rot-bo·tot
Nina nitochongmot-
Niwataton ka·srok ka·srok
Da·nang an·sengbejok
Gisik chanchi ka·pakchongmot
Mikchi tingtot tingtot.

4. Gose angde-
Man·kugenma nang' gitakode,
Silpajaoba songtang gitade,
Dongkugenma banobade

Ui·ja angade.
 Diksiksamangmango
 Chanchia gisiko,
 Ka·san ang' ku·rang jumango
 Jagringsa songtango.
 Mera gisiksa aramo
 Ma·pile basako?

CHINGNI DONGRAM

1. Dongtoa, Dongtoa, Dongtoa ching' brio-
 Balwa pang·sang balsri balsri rong·ma patalo.
 Samrang bolrang nitoa, a·bri a·ding rotoa,
 Jawa songni a·gittalrang da·nang matdua.
 Chingni dongram A·chik a·bri a·song balnama.

2. K'natoa, K'natoa, K'natoa ku·rangrang –
 Do·ni ring·a chiring ga·ma katchaanirang.
 Dongja chingna a·sako k'natobata sulrango,
 Gaantin' ku·rang, do·ni gitrang burung bolgrimo;
 Chingni dongram A·chik a·song katchan' ku·rango

3. A·brio, a·brio, a·brio ching' dedrang –
 Rong·ma rikkim silang bolgrim chingni
 neng·takram.
 Cha·gen ta·ma e·chingko, gal·da baring jal·likko,
 Ta·ja ta·ring, rne·a wa·ring burunganiko.
 Chingni dongram A·chik a·song chingni
 neng·takram.

4. Nitoa, nitoa, nitoa ching' 'brirang –
Rona nama an·sengbca rong·mapatalrang,
Nitogipa bibalrang, tangsekgipa a·barang,
Rona nama nitwattoa balwa pang·sangsang.
Chingni dongram A·chik a·song chingni an·sengram.

A·CHIK A·BRI

1. A·chik a·bri nitoriri –
Nina gitik ka·sri ka·sri,
Aram kimit balwa balmik
Salguri salmik.
A·chik a·bri nitoriri
Aram chapchap balwa balsri.
2. A·biding chu·chan chu·chan,
'Bri kimbe pen·pan;
Bol rike pichap pichap
Tangsim rikrak –
Aiao da·nang 'brirang apsan
Niwato pang·sang.
3. A·chik a·bri nio tapsri,
Nina gitik ka·sri ka·sri;
Ja·ret ondime gongge gongding
'Brirang da·nang.
A·chik a·bri nitoriri
Nitobata nio ta·sri.

4. A·breng a·dalrangba
Peng·pat suet,
Kosak ka·ma sambeng
Gitching ruet,
Nigamaton ka·sariri
A·galmak kari.

5. Aiao da·nang ka·sri ka·sri
Niwataton chel·aoni:
Aram pa·chap simdim rikrak
'Brirang mitap.
A·chik 'brirang nitoriri
Gisik ra·gen ka.sariri.

SONG CHEL·AO

1. Assam a·song' saliramchi
Dongpa·a a·brin' jat songsa;
Chonbeoba a·song chingni
Songdongram ching' ma·pagitchamni.

A·chik song,
Gamchatbea atchiram song;
Nang·na ong·chong nama rasong,
Silpajaoba ching' A·chik a·song.

2. Chanchiaton ka·sri ka·sri
A·chik 'briko nitoriri,
Nikatman·a ang' chel·achi
Atchiramko anga gisikchi.

3. Ka·saa angni ma·parangko
Ang' jong-norangni ku·rangko;
Knagenma songgipino
Re·ange A·chik songni chel·ao?

4. Gamchatanirang a·sakna
Dognuenga gita na·a,
Tusienga burunggrimo
Mikrakgen miksele basako?

KU·RANGTANGCHI

1. O, Chingni pagitchamrang,
Ring·na skipabo.
Knachina A·chik dedrang
Nang·ni ring·a sulko.

2. Miko' chiring bisikoni,
Chiring joka gita;
Seng·at A·chik gisikoni
Wal·tot nata gita.

3. Buring grimo do·ni ku·rang,
Knatoa gita,
Mejekpana damben' sulrang
Ring·sningna gita.

4. A·bri, chiring, burung, bolgrim
Batjava singhason;
Jeon ong·gen chingni mikkim,
Ching' chongipa a·songon.

5. *Re·ba, re·ba, re·mikkangba,*
Pilak A·chik dambe;
Similgipa chachat ganda
Ong·bo me·tra·pante.

6. Ringbo chiring chijanggiko
Panterang me·trarang,
Ringsik seng·an ku·bibako
Pilak A·chik dedrang.

OKAMENGA PILAKKO

1. Gisik sikan' suakesa
Chengatenga ku·rangko;
Chro·chro ring·rimnasa
Okamenga pilakko.

2. Ku·tangko tangbangatna,
Ku·rangko gam·sokatna
Ku·onninggrikanichi,
Pilak A·chik mandeba
Jatna ka·saan' gisikchi
Pante·me·tra pilakba:-

3. Wal·ang riprapattokbo,
Bil·cham so·dikkatpabo
A·chik sea·jotachi,
Segiminko ra·achi.
Pilak A·chik mandeko
Mol·molenga ka·saachi.

DUKRANGKO AMTOKE

1. A·gilsak janggi-tangao dukrangchi sinchepon,
Ka·sara, namnika, kusin' ka·sine dimelon
Ripeng, bakrima, ma·drang janggile chel·angon
Gisikni-mikandal duko
Dongna nangaha,
Sikdikdik ku·boso saksan
Denggoke dongaha.
2. Gisikni bal-jrimarang pilakchin su·pekjok,
Matgitcham dukni parirang tengtoe sabajok,
Rasong grin-janggini salrang indaken re·angjok
Simgipa aramrang gita
U'rang duulaha,
Waljatchin' wal gita
Namen andalaha.
3. Ripengrang namgipa angni da·o dongjaha?
Gisikni seng·anirang andaljripaha,
Ka·saan' ku·rangrang srikritikaha.
Chipakkore pokpekon
Duko dubiaha,
Dukni sagalon
Janggi sripaha.
4. O, ang' ka·saarang maina gala angko?
Nikoba niggija dake angni dukni salo,
Dongja ka·dimeatna pilakba angko da·o.
Rasong grin' wario
Nom·boke balbona,
Atchijok a·gilsak duko
Mikchio dubina.

5. Oh, a·gilsak angni nang·ni mikkang bao?
 Oh, mande-jatrang nangni ka·saa sao?
 Oh, Nokgipa Na·an parakgenma da·o?
 Parakbo ang' gisiko
 Ang' dukni a·selko,
 Ong·jaode balko
 Balponge talatbo.

6. Parakjok angna gisikni jagringo,
 Ang' gita rasong gri bang·bea denggokengako:
 Rasongni Songona janggirang simakengako-
 Neng·takna jringjrotna
 Rasongchi teng·sue,
 Ring·pana, ka·srokna
 Dukrangko amtoke.

JAGRING TENG SURIKGEN

1. Jagring mikkim niktaikuna
 Am·genoba a·kitikna,
 Man·jawaha chasongrangna
 An·tangtango andalana.

2. Mukut, rasong, singhasonko,
 De·a·minga a·gilsako -
 Changa-sapa, lekka-pora
 Manden' jatna chuarara.

3. Tangka, sona, hira, mukta,
 A·gilsakko ka·pakata;
 Bi·sarangni gisik gita -
 Manderangko mikbokata.

4. Bebe aro ka·saani –
A·gilsako teng.suani,
Tochri gnang chaki gita
Andalako seng·atani.

PATTIGIMIN RASONG

1. Rasong janggi sikrime bimang a·mang nangjaha.
Maha maha songdime jakma neng·na nangjaha;
Salarikit kusini sukni sagal tipjaha,
Walarikit roani sukni jumang pil·aha.
2. Rasong balwa nangana rasong mukut pil·aha;
A·sak suknirarachi be·en gimikko pinaha.
Chasong janggi tangani indioba batangjok,
Pilak kusin' balwarang dimu gita balangjok.
3. Man·jok nitoaniko a·rang a·dang janggina;
Chinjok ba·ra bokako songsonganti niksengna.
Cha·e·ringe a·sako sukni be·en pilaha,
An·gisikna dingchike mikkim chi·rongbalaha.
4. Rasong a·mik patana rongsim-rongsikbataha,
Nio mikchikimana songsonganti jangaha.
Mandeska de·ana ku·ba·gisik tang·aha,
Chicha bokbaka gita rasong a·sal pilaha.
5. Indioba rasongsa, bimik·cheksi najawa,
Bibal chokchim a·sakna bilsu rikit baljawa;
Gitni ku·rang boldimo indinari gam·jawa
Rongchinggipa sal·ja·dil saljatchina su·jawa.

6. Patigimin bimik rasongni salna sikrepge,
Mingsinggipa gunrang balwao balpongantokgen;
Do-gisika paksachipak rasong gital nagen,
Rasong baksa ka-saanisa chasongna simlgen.

RITIMKARI

1. Mia-misi chabaengjok mikka chijimana,
Sara- samsi ritimjok- tangsekgilgil nina.
Sakchi aram mitapna riprap riprap delipe,
Wajok wachi gitalna mikka- balwa ta-rake.
2. Ding-karini balwana aram simchirikaha,
Sam-bol tangsekgilgilna wachi gital sokaha;
An-bigilna an-gipe chinjok tangsekgilgilko,
Ringrang ringrang ching-chipe teng-suchakjok
a-sako.
3. Attam wal-kumikjajok a-galmakkari gita,
Dimu rippang baljajok songdu an-cheng kitgipa.
Wal-na-china kenjaha, samcheng-agal chijimjok:
Mikkang me-te satjaha; sara-rona rotojok.
4. Mandal bibal gitchakbal bale
balchamangmanjok,
Chi-rengriprip jakgital jakritime bijimjok;
Sara wal-tim sikramo samsi namittotbajok,
Sambangguri kamtongo ringsonggital ritimjok;

5. A·sesamni sinaru rimitchipchip balbaengjok,
Noksamoni akkaru wa·gong wegatbaengjok.
Chikoramoni bolchu jakritime bijimjok,
Saraoni te·gatchu bite rongrongtebajok.
6. Boldim ringsonggitalo do·bret bitip ra·aha,
Chiring rong·ma patalo gan·drak gakgakbaaha,
Beng·blokrang ong·katjok a·paljolni chibolo
Bitchi chi·na rerajok atam wala simsimo.
7. A·sesamni bolgongo bokdim ong·jok wa·gambal,
A·ba wa·pang kamtongo mittotbajok me·awal:
Attam wala simsimo do·burungrang jikjakjok,
Tuna bolgrim bijimao siksik-saksak sandijok.
8. Sangkra bandil bandiljok burung bolgrim gisepo,
Arobakrang ritimjok kamtongspa bipango,
Ta·ja·narotgonggriting bolgong·wa·gong weaha,
Ru·at- agal gol·ikeng a·sesamo malaha.
9. Attam a·ba re·bao me·awalko subajok,
Buring·rona napsiko songrurako akbajok;
Me·chik·nomil desarang arobakko am·bajok,
A·daloni gal·darang kape cha·na nambajok.
10. Ringna gitik chijimjim jokenggipa chiringrang,
Ding·karina ka·sinjrim an·senggipa balwarang ;
Nitoani a·sako changsa balgaotaiaha,
Pilak ong·atgimino dimelani dongjaha.
11. A·gimikna boljanggi ringsong- chagattaiaha,
Jabilsina rongjanggi rongchri- rongkotaiaha:
Pattiani dinbajok ong·atgimim gimiko,
Nangdapani dongjajok manderangna a·sako.

12. A·ba-bolgrim burungrang aganprakenga gita-
Do·o- matni kurangrang rasong on·enga gita,
A·song balnang balsiri mande sakna balnama,
Gisik mangmang ka·siri dukni salo guala.
13. Dandak-dandak chong·doe a·sal sakna danbajok,
Rajan' nokna batpile gamseng mitap jin·bajok;
Indioba sari-gri mikgil mitapsnichi
Simakjawa niari mikchipenga gisikchi.
14. Gose da·nang indiba rongjanggide ran·aha,
Bilsu-kari sokoba indin ong·gramaiaha.
Nitogipa bario teng·suani dimeljok,
A·sal dandak chong·ao a·song cha·asibajok.
15. Songo cha·asimiting da·nang game- cha·gipa,
Ta·buringo tangmiting cha·na migirigipa.
Bi·sa-desa ram·miting gimin cha·na alsokjae,
Gamgipa bil·be·miting okna a·ba-re·ange.
16. Atam a·basokbao ta·buringko ritgope,
Cha·arijok noktango bi·sa-desa okgape.
Samjak-me·su ritako okgapatna cha·ani
Okchirippet dakako nikjok bi·sa-desani.
17. Mia-merong rongsaba rongjanggiko sikjajok,
An·gil ching·kalgipaba dengdobikkik dakaijok;
Ja·a jakgolangsijok bi·sa oktongsisirang,
Greng-guasu nagaljok bilgilari ba·rangrang.
18. Te·brong bite rongrongte nike ku·chi minoka,
Ku·chi mittap nitate ake cha·e nimana.
Tokchang-tokchang samtangtang songna dukni
sokbajok,
Da·nang saoba- saobarang wal·ko-chikon sikjajok.

19. **A·ki-a·sal jimgijao samsi chagija gita,
An·gil daknanggipako kini rokgimin gita:
Bimang manggisi gita bibal bari jatchio,
Gangma minenga gita mikkang sona bibalo.**

20. **Pattigimin mandena rippingchina nimakon,
Mite- Misi-Saljongna Kamal wachi tatjakon;
A·songari wangdate cha·gipachi pakmakon,
Chasong rik. : wa·rame gisik do·tekmeakon.**

21. **Pattigimin rasongko mande a·nangatjokma'
A·song-kosi gimiko marang jo·oldapjokma?
Ong·atgimin rasongna ringrang mesokanima?
Ringrang Ritimkarina mande kiratcha·jama?**

EKANGANI

1. **Janggin' salrang mikjapsa kimit mikimitaha,
Andalsimsim a·sakna salsa salnaptaraha;
Mikgil mikjapjawaha, mangkra ba·e bikapsa,
Sikjaoba watnajok ka·saarangko dikdiksa.**

2. **A·gilsakko cheaha-pilak a·sak dukrangko-
Silchidare nangjaha bate re·na Jordanko;
A·sak muni marangko sippodape galbajok,
Sia-saani bojako sia aktetgalbajok.**

3. **Baljanggisa arara balpongangjok rang·gitik,
Ka·beoba ka·tongo chipjawaha an·gimik:
A·gilsakni bikkapko sia beri delaha,
Janggi silchi neng·takna be·en a·mang pil·naha.**

4. Angna mikchi ong·nabe angni pilak ripengrang,
Bika a·dram be·nabe ang' no·ama, jik·dedrang;
Mikchi be·en pil·jawa, mikchi waring jokoba,
Dukni sagal tipjawa sinti do·pilgimoba.
5. Patat' bibal gipokko angni mangkra gitoko,
Galat' chokchim balsako on·e ka·saan salamko;
Watat' gisik mitapchi bi·chakani kemako,
Nichaoenba u·site kalimani mikchiko.
6. Ang' bak·ripeng sanaba groni sildeng ungoba.
Kema bi·a watchina bimang manggisioba:
Ka·saarangni grorangko donggenoba hanoba,
Chottomatjok sildengko mikjap·mikjap bi·enba.
7. Janggi tangan' salrango pattia'ko man bejok,
Pattigimin salrangko arang·a·dang bon atjok;
Indioba ring·kugen de·mittele rasongko-
Siangoba janggi·sıl Chinalsako batango.
8. Dukni sildeng bachijok·angko ja·kintekgipa,
Sian' beri baosajok·angko delgittanggipa?
Balwa gita sipjokma dukni chipakkorerang,
A·ning mitap napjokma sabisini jo·ongrang'.
9. A·kol wang·a gitalo be·en a·mang pil·najok,
A·an bimang gitcamko misil misil galangjok;
Indioba cham·jawa janggi gisik silchide,
Gronggriktaigen arimo basakoba changsade.
10. Ka·sabea ang'dedrang, angko gisik ra·nade,
Krengbebo na·simang ka·saan bilchi chenade-
Na·a jeko man·para on·bo ukon ka·saana,
Jeon kamrang ka·sara teng·gen na·mang janggina.

11. **Gisik-bilko** galnabe wakni mikkango gita,
Miksongako watnabe janggi chiripa gita;
Gane beben' mukutko bu-sugrimko re-oba,
Janggitangni salrangko pattiani chanenba.
12. **Pringo do-gisikjoko** nama kamo susana,
Atam wala suna mo rasong on e nengtakna
Mingbo nangni kamrangko mingantiko chandime
A-sak re-a matchoto katchae janggi neng-takna
13. **Atam salni** napango bibal sikrepa gita,
Marang guang binangko sia ma-ekgikati
Chipgen unon rediba sunlam dongripa.
Manden' Janggi-silehina biba simla gita.
14. **Jekai** bijak mojumo balwa balsiriana.
Jakrimta bijakrang nanggen unon ga akna,
Dring gitcham ga-ake soruronggen a-mango,
Kariona dandake a-sal pil na ja-pango
15. **Chirang** sipe chadogen biba pil-e atamo,
Indakesa su-sranggen pilak ong-atgiminko-
Unon janggi siktaegen, pilak janggi a-sako,
Chibimani chirangba nangdimtaigen sagalo.
16. **Maiko** aganangkugen, angni ku-rang najajok,
Nasimangde nikjaenggen angko rimna re najok;
Nitogipa teng-suan rasong ringrang-ringrangjok
A-gilsakni bikapko gale gansicangmanjok
17. **A-mangoni** bibalchi angko salam ka-rikbo,
Angni sko donachi ka-saan' holko ge-rikbo
Manggisini mikkangchi salam ka-e sakprakko,
Watangnajok 'songtangchi ka-pakoba na-mangko.

18. Bakdrang, ripeng, jik-dedrang, re·najokne angade,
Ka·sagrikbo a·sako angko gisik ra·nade;
A·gilsako ong·jaoba an·ching janggi·silchide,
Gronggrikaigen arimo basakoba changsade.

KARITANGNA BILSI SOKON

1. Bilsisokon an·seng an·seng,
 Songnok bari chi·jeng·chi·jeng;
 Attam pringo sin·jrim sin·jrim
 Guuri pang·sang ‘brirang simdim.

 Sakchi rikrak-rikrak tangsim-
 Suurin’ aram bokdim bokdim,
 Salni jagring re·a gongding
 Teng·suange ka·sin ka·sin.
2. Sara samsi bandil·bandil,
 Nitoriritangsekgilgil,
 Songni rama·sorok ta·ding
 Balwa ringna balbring·balbring.

 Pul·bibalrang boksogimgim-
 Barirango rimitchinchin
 Bala me·gong bibal bokdim
 Ka·ritangna il·gim·il·gim.
3. Bilsli sokon an·seng an·seng
 Songnok bari chijeng chijeng,
 Attam pringo sin·jrim sin·jrim,
 Guuri pangsang ‘brirang simdim.

Mesariba rimitchinchin,
Balwabalmrik ka·sin ka·sin,
Biba pa·ang silmildingding
Ge·a patal ramadingding.

4. Bilsi sokon katchatoka,
Bi·sa·desa an·sengtoka-
Atam pringo jipjang-jipjang
Jikjak-jikjak katchan' ku·rang.

Balbring balbring an·sengriri,
Ku·rang sale ka·sri ka·sri;
Me·tra- pante riprang-riprang
Gane·chine illip·ildang.

5. Bilsisokon an·seng an·seng
Gisikrangba balbojengjeng,
Dal·a- chona ta·kreng-ta·kreng
Ja·ku de·an ritcheng ritcheng.

Songo- noko kimko kimko,
Katchan' kurang bikbo bikbo
Song an·sengan aman' 'songo
Karitangna bilsi soko.

GOKAREK-GOK

1. Songo-noko dongari rona inoba,
Songtang an·sengpajanan gong·ja indiba:
Samtangtangchin burung bolgrim balwa ringnaba,
Mitip-mitap, so·so·jengjeng sara·ronaba.
Gokarek-gok, gokarek-gok,
Do·gisikjok songtango Gokarek-gok.

2. Game-sue cha·ari dongna inoba,
 Songtang an·sengpajanan gong·ja unoba:
 Bikipil-bawil chanchiman·a da·nang ukoba,
 Bilding-bildang, jaja-jiji dake gisikba.
 Gokarek-gok, gokarek-gok.
 Songna do·gisikengjok, Gokarek-gok.

3. Dongramtangko watnapja rogimalenba,
 Wate re·na ka·paka songrenikjaenba;
 Chigatangna, nokaptangna song-nok siljaoba
 Changsa pil·sa chanchiman·a da·nang ukoba.
 Gokarek-gok, gokarek-gok,
 Do·gisikon ka·paka Gokarek-gok.

4. Gisep-gisep an·sengani songo-nokoba,
 Chrok-measae, cha·e-ringe song an·sengjaoba;
 Basakoba katchan' sa·rang a·songtangoba
 'Song gipino man·na amja jeko indiba.
 Gokarek-gok, gokarek-gok.
 A·chik songna gisikjok, Gokarek-gok.

5. Gisikode a·songtangko man·ja gualna,
 Song-nok gittim bari bolgrim an·sengpajaoba;
 Dong'nok gisik sikdikdike a·songtangoba,
 Jeba ong·bo songtangkode sokja pilakba.
 Gokarek-gok, gokarekgok,
 Seng·na do·gisikengjok, Gokarek-gok.

GACHIOBA AN·SENGA

1. Jik·kimoba man·dik·man·si dakbea,
A·ko game bilba neng·na nangbea,
Oe mai, bebe mai,
Panteosa jechi jachi ronaba,
Nangarangna re·paoba inbea
Aganpaoba jegriknasa botaia,
Oemai, bebemai, man·dik·mansi.
2. Bi·sa ba·rik·rodilnaba man·dika,
Bi·sa grapon mumunaba changpaja,
Oemai, bebemai;
Setangkosa rodilchina inaia,
Desatangko malmoknaba sappaja,
Basak‘bade grapsrangnasa sikaia.
Oemai, bebemai, man·dik·mansi.
3. Bi·sa ba·rik·rodiljaoba namjawa.
Bi·sa gnang mi·bijakkon song·jawa;
Oemai, bebemai,
Basakoba song·paoba minatja,
Simsakgija song·arigen mikoba,
Aganpaoba ku·keng·wakeng inaia.
Oemai, bebemai, man·dik·mansi.
4. Attam·pringo roamoba mangnenga,
Bachi maina re·angaha insoa,
Oemai, bebemai,
Noktangoba so·sojengjeng ka·soa,
Noko rooba watna·chengna changpaja,
Roramoba bate·bate arata.
Oemai, bebemai, man·dik·mansi.

5. *Jeba ong·bo gachi ong·e dongnajok,*
Nomilrang ba me·apajok inajok,
Oemai, bebemai
Bi·sarangba ‘Baba’ ine okamjok,
Manderangba ‘Ang Jong-pa’ ‘nedemingjok,
Gachioba gisepode an·sengjok.
Oemai, bebemai, an·sengnikjok.

DONGODE ANG·BAKSA

1. Rong·ma pattalo dongode ang’ baksa
Ki·tap kingsa, ringani lausa, mi palsa
Aro ka·dimeatna saoba saks-
Ong·genchimma suknirarasa?
2. Chubatsranggipa a·brini pattalo,
Ka·sina balwana bijakrang jimjeo,
Chubate chanchina angna on·bo-
Dikdiksa gualé a·gilsak nang·ko.

DONGODE UN·BAKSA

Poraina namgipa ki·tap,
Rona nama badiaba biap,
Knatogipa gitni sul,
Similgipa bibani pul,
Nama-nama cha·ani,
Aro noksa-salani,

Dongode un` baksa
 Hobani chatchi saksa,
 Anga jechaknapjawa,
 Janggi sina sikjawa –
 Iarang angni nanga chu-gimik,
 Batjawa angna a-gilsak gimik.

REBA P'LAK NOMIL – PANTERANG

1. Re·ba p`lak nomil - panterang, nomil – panterang,
 Ka·srok ka·srok katta – ring·at', katta·ring·at';
 Damsan damsang ku·rang salat', ku·rang·salat':
 Re·ba p`lak nomil-panterang, Damsan damsang ku·rang
 salat'.
 Re·ba' wai, Re·ba' wai, Re·ba' p`lak nomil-
 panterang.
2. Ka·sirokrok bangsi sikat', bangsi sikat';
 “Sososoet” ku·simikat, ku·simikat;
 Damsan damsang jakpa dokat', jakpa dokat',
 Ka·sirokrok bangsi sikat', Damsan damsang ku·rang salat'.
 Bangsi sikat', bangsi sikat', bangsi sikat' pilak
 panterang.
3. “Dadingdachong” dama dokat', dama dokat';
 Nomil “Gogai” doke niat', doke niat':
 Nomil pante jikjakjikjak, jikjakjikjak,
 Re·ba' pilak nomil-panterang, damsang damsang ku·rang
 salat'.
 Re·ba' wai, re·ba' wai, reba' pilak nomil –
 panterang.

4. Wengwat-suet jaku ga-at', ja-ku ga-at';
 Songna-nokna kimko-kimko, bikbo-bikbo:
 An-sengriri mesatokna, mesatokna,
 Jangangchina ka-sirokrok, damsan damsan ku-rang
 salat'.
 Mesa' wai, mesa' wai, mesa' pilak nomil-
 panterang.
5. Re-ba pilak nomil-panterang, nomil-panterang,
 A-chik sulko janggamatbo, janggamatbo;
 Darang gipin sulna batat', sulna batat'.
 A-chik pilak nomil-panterang, A-chik sulko knatoat'-
 Re-ba' wai, re-ba' wai, re-ba' pilak nomil-
 panterang.

RING-CHOE SAKSANJOK

1. Atambal- ka-sinjok,
 Jajongba jateng-bajok.
 Chibiman' rikamo,
 An-senga roramo;
 Sam-bolrang nitoriri,
 Nikaijok an-sengriri.
 Nikani nitoriri...
 Ka-sine, ka-sine, ring-choe balpakna
 Chibimao an-sengriri.
2. A-sako nitoani-
 Gisikna katchaani-
 Ong-china kusin' baksa
 A-gilsako changsa
 Ka-srokan ku-rang sale,
 Ropana ang' ring choe.

Chibima saporiri...
Ka·sne, ka·sne, ring-choe balpakna
Chi-kosak balsri balsri.

3. **Jateng·an ronggrikbejok,**
 Chibiman' chi-rong-nongjok;
 Ringrang-ringrang nitojok
 A·gimik teng·sujok.
 Salgin' askirang nitoriri-
 Chi kosak' chungchetari.

 Gam·ani ka·sariri..
 Jokanga chibiman chi-gam·ani baksa
 Ku·rang ka·sri ka·sri.

4. **Rasongni song nok gita**
 Ringrange nikata;
 Man·genma basakoba
 Indonga salko changsa?
 Mikandala ang' a·sak
 Chanchion ka·pak ka·pak.

 Chanchion ka·pak kapak...
 Ka·sara, mingnama, knatoa, nitoa,
 Balponge aram kosak'.

5. **Jajongba napsrimjok**
 Attamba waltingjok
 Kimitjok gittim da·o jripjrang
 Janggide jumangjok,
 Ring-choe saksanjok.

 Ring-choe saksan a·sak....
 Ka·sine balpakna chi-kosak jumango
 Aram pa·chap pa·chap

OHOMA

1. Akaruma kobokma sima chaama, sima chaama?
Nomil-pante an-sengao mesapanama, mesapanama?
Ohoma, Ohoma, Oe nanggo, Oe da·nang:
2. Lauma gonggedangana chia ko·jama, chia ko·jama?
Dama-dachi dokana ja·rikpanama, ja·rikpanama?
Ohoma, Ohoma, Oe nanggo, Oe da·nang:
3. Kotip bakjakjakari kabo pantea, kabo pantea;
Gana tengchap wentonge ganbo nomila, ganbo nomila.
Ohoma, Ohoma, Oe nanggo, Oe da·nang.
4. Sosoetna soetna bangsi sikana, bangsi sikana;
Ja·a ga·suetrimda angming mesana, angming mesana.
Ohoma, Ohoma, Oe nanggo, Oe da·nang.
5. Atam jajong jatengao ringe rokuna, ringe rokuna,
Jawa songni nomilming an-sengpakuna,
an-sengpakuna.
Ohoma, Ohoma, Oe nanggo, Oe da·nang.
6. Pante ong·arinasa pekmilangkuna, pekmilangkuna;
Maia chatchi de·aming singe nikuna, sing·e nikuna.
Ohoma, Ohoma, Oe nanggo, Oe da·nang.
7. Jajong jabitchimaona mesai ninamo, mesae ninamo?
Nomil pante kangrike ringe rona mo, ringe rona mo?
Ohoma, Ohoma, Oe nanggo, Oe da·nang.
8. Nang·ko bimung man·kuja na·a sawamo, na·a sawamo?
Atcho, dama dokkuna watpakubomo watpakubomo.
Ohoma, Ohoma, Oe nanggo, Oe da·nang.

GOGAIWAI, GOSAIWAI, DIRENGWAI

1. Dama barat siringe dokbo gose chamea,
Bangsi gital so·pue sikbo noba na·ara,
Go... Gogaiwai, Gosaiwai, Direngwai.
2. Dama bidap chitinge dokna gose angade,
Da·a walde waltinge “Direng” dokna anchingde.
Go... Gogaiwai, Gosaiwai, Direngwai.
3. A·an timtim ga·nabe, a·banggiri monabe,
Chian chokchok ronabe chibanggiri satnabe.
Go... Gogaiwai, Gosaiwai, Direngwai.
4. Da·si re·bagipako namnikama panteko?
Nang·ming “Direng” dokrimna don·nok anga damako.
Go... Gogaiwai, Gosaiwai, Direngwai.
5. Biri agal so·ani wal·ang anga nikatjok,
Chame Tura jilani ku·rang nama kinajok.
Go... Gogaiwai, Gosaiwai, Direngwai.
6. Ku·ba e·ching bisoksi simildingding simila,
Ku·rang sala gaanti da·sionin kinara.
Go... Gogaiwai, Gosaiwai, Direngwai.
7. Do·kuasa chirengrip roa gose pantede,
Kini chita chi·jengbit do·ka manggisim gita.
Go... Gogaiwai, Gosaiwai, Direngwai.
8. Delang buchu wensoke rona gose angade.
Do·sadipil onchoke “Direng” dokna an·chingde.
Go... Gogaiwai, Gosaiwai, Direngwai.

9. Gangguasa engenga an·chi opna man·jaeming,
Songonisa miknenga angko nina sikjaeming.
Go... Gogaiwai, Gosaiwai, Direngwai.
10. Chu bisire ringesa da·nang peka daktoka,
An·tangtangko dondape ma·a noa intoka.
Go... Gogaiwai, Gosaiwai, Direngwai.
11. An·cheng sori soreo na·bat koirang manggni,
Samsi bandil bandilo pante ro·reng sakgni.
Go... Gogaiwai, Gosaiwai, Direngwai.
12. Balsri balwa balana bola bijak moasa,
Angming “Direng” dokrimna nomil te·rak na·asa.
Go... Gogaiwai, Gosaiwai, Direngwai.
13. Ramasamni me·apek bambek ‘noba angade,
Chame ra·e ronaba kirapaja pantede.
Go... Gogaiwai, Gosaiwai, Direngwai.
14. A·sesamni te·bibal bite nangna balenga,
Baoni pante ro·rengbal maina bo·e roenga.
Go... Gogaiwai, Gosaiwai, Direngwai.
15. Do·bisako balgipa da·nang do·reng gakasi,
Jilla nina inode rebo Shillong Gauhati.
Go... Gogaiwai, Gosaiwai, Direngwai.

SALSAMANGMANG AN·SENGNA

1. A·dingsiri-sirio. Mite- mande peng·pango,
Songdu- sagal- niwatna, Balwa rippang ringsikna;
Sikko- doba balliping kae, Gue moja supari cha·e
Rona ‘noba da·alde, salsamangmang an·senge.

2. Bolasari ja·pango, samsi bandil bandilo,
Rotoriri a·songna, Ka·sariri golpona;
Ka·sirokrok bangsiko sike, wa·pang sumeratako done
Rona 'noba da·alde, salsamangmang an·senge.
3. Rong·ma rikkim pattalo, do·amekni wilwilo,
Songdu jahat niwatna, nike gisik pang·sangna;
Ripeng baju namako, katta ring·na changako,
Rona 'noba da·alde salsamangmang an·senge.
4. Rona·chona inoba, degirisa an·senga,
Attam bangsi sikoba, panteosa niksenga;
Katta ku·rang bangsina sale, mika·mikjip ka·dingsik ring·e.
Rona 'noba da·alde, salsamangmang an·senge.
5. Roa·choa inode, inbo gose da·alde,
Jeba ong·bo ropana Ranggirako niwate
Sona·misi riprangko nie, tangka baoriramko sane,
Rona 'noba da·alde, salsamangmang an·senge.
6. A·ding 'biri pattalo, silang rong·gitcherao,
Mande gita golpona, mite ganda wilwalna
Gisikrara mitesak nike, manderara Ranggira wene
Rona 'noba angade, salsamangmang da·alde.

SIKATANG

Sika, sikatang, p'ilakkon brena nanga gri:
Brena man·gijarangba chingni,
On·giminrang sikatang ra·ani.
O, k'nabo gam·enga gitni sulrang,
Boldimgrimo katchaan' ku·rang,
Knatoriri ringenga do·drang.

Tangseka 'brirang 'ching roramrang,
Rimitchip chaa mi-misirang,
Niwatto' a·du tangsim pang·sang-
Sal-kari soka jensalo – sikatang.

Jawan' rasongde 'chingna batja,
On·giminrangko teke donja,
K'nabo, katchaan' ku·rang a·sak gapchina,
Sika, skatang.

MIKKANGTANGO GITA

1. Dikdik salrang ong·aioba
Ru·uta bilsirang gita,
Songchel·achisa ong·oba
Mikkangtango gita,
Nikatenga nang·ko gisiko
Riprapa jagringo
Kimitgenma nang' jagringko
Riprapgen andalao.
O... O... ...
2. Watatgenma kobor changsa
Mikka aram baksa;
Balbring balbring jipjang jipjang
Re·baenga gita,
Rimit rimat mesokgenma
Changsa tusidapate
Ku·rang ka·sri agantaigenma
Ku·chimitmit niate.
O... O... ...

3. Basakoba changsamangmang
Rasongni teng·suao,
Rinok-terok nang·ni bimang
Ang baksa sambao-
Tangsim rikrak nitoriri
Chibiman' rikamo
Ka·sinjrimjrim balwa balsri
Jateng·an attamo.

O... O... ...

4. Dukrang chipakkore gita
A·gilsak pokpekon,
Ka·saa bibal rongrikbea
Ga·ake dimelon;
Dongkugenma nang' jagringde
Jumango gitade,
Teng·kugenma nang ka·saade
Ui·ja angade.

O... O... ...

SAKSAN SIKDIKDIK

1. Saksan sikdikdik
Ong·an somoio,
Gisiko dikdik,
Nang·ko chanchio;
Ka·a suangwang
Nikata nang·ko,
Na·asan mangmang
A·sak gimiko.

Saksan nang' dongjao ang' sambao,
Saksan nang·ko nikjan' somoio.

2. Jumango gita
Nang·ni ku·rangko
Knataikugenma
Basak'ba changsao?
Ka·dingtaikugenma
Kratcha·e mikkango
Ka·sariri nie
Atam jatengao?

Saksan nang' dongjao ang' sambao,
Saksan nang·ko nikjan' somoio.
3. Simila gita
Bibalni balo,
Ka·sroka gita
Ka·san' ku·rango,
Katchaani chimik
Nang·ko gisik ra·o,
Guale dikdik'
A·sak dukrangko.

Saksan nang' dongjao ang' sambao,
Saksan nang·ko nikjan' somoio.
4. Nang·gitan tiktak,
Aski rongsako,
Teng·enga srak-srak
Nikgen salgio?
Nagenma unon
Aski ang' sambao,
Janggi neng·takon
Jringjrot salgio?

Saksan nang' dongjao ang' sambao,
Saksan nang·ko nikjan' somoio.

JARANI KORE DOKA

1. Kore doko kore dok'
Kore doke rogini –
Cha·e nio rongbol dok
Cha·na man·o cha·gini.

Jara solo ka·dingna
Wagamai wabrakbrak
Cha·na man·jao tusimna
Oksangkapkap gangborak.

2. Gisik a·ning bitangkal –
Bitna wa·sagipade,
Kotaningko salangkal
Taning mikmakatnade.

Bolna wa·na ka·dingna
Wagamai wabrakbrak,
Cha·na man·o cha·pana
Bikma kring oktinggak.

3. Lekka-pora man·angkal
Lekka chiprakgipade,
Sena-jotna sapangkal
Gisik tiktakgipade.

Mejasalko salnikja –
Gingma-gingpel gingsidep,
K'nasalko kinaja
Jara miksildogetget.

4. Nokma raja ong·angkal
Nokma tokrakgipade,
Tangka jengbong donangkal
Jengbong kebitrakode.

Kore doko kore dok
Kore doke roginì -
Jara sole robojok
Sawa badinpa·gini.

5. A·king-gore man·angkal
Kange kingkangatnade –
Rasong mikkim chuangkal
Gingmat chagatgipade.

Nama-namja chinapja
Jarasimsim mikgilgep,
Tangka-sona gamchatja
Jarawakwak ginggepgep.

6. Nokdang-ba·ku dakangkal
Dongnanggipa bipade,
Jikma-jikse dongangkal
Donge rona inode.

Dukko-sukko chinapja
Jara ku·chi rorara,
Kena-sia cha·totja
Bigil wakbigilara.

7. Songko-nokko dilangkal –
Dil·diljawa inode,
Torom rama re·angkal
Toratangko watode

Kore doko kore dok·
Ringgijaba pekgni
Cha·enio rongboldok
Cha·gijaba rakgini.

8. Gamu rim·na gong·angkal
Rim·na tektakgipade,
Mia jamo pakangkal
Pako okkagipade.

Kore doko kore dok'
Kore doke rogini,
Cha enio rongboldok
Cha·na man·o cha·gini.

9. Jara solo ka·dingna
Wagamai wabrakbrak,
Doke galo sipana
Ja·bra-jakbra gangborak.

Kore doko kore dok'
Kore doksrangaigini
Cha·na man·o rongboldok
Cha·e sisrangaigini.

CHA·ASIA

(“Ritimkari” poedooniko ra·ongkatgimin)

Dandak·dandak chong·doc a·sal sakna danbajok,
Rajan' nokna batpile gamseng mitap jin·bajok;
Indioba sari·gri mikgil mitapsnichi
Simakjawa niari mikchipenga gisikchi.

A·ba-bolgrim burungrang aganprakenga gita-
Do·o- matni ku·rangrang rasong on·enga gita.
A·song balnang balsiri mande sakna balnama,
Gisik mangmang ka·siri dukni salo guala.

Gose da·nang indiba rongjanggide ran·aha,
Bils-kari sokoba indin ong·gramaiaha.
Nitogipa bario teng·suani dimeljok,
A·sal dandak chong·ao a·song cha·asibajok.

Songo cha·asimiting da·nang game- cha·gipa,
Ta·buringo tangmiting cha·na migirigipa.
Bi·sa·desa ram·miting gimin cha·na alsokjae,
Gamgipa bil·be·miting okna a·ba·re·ange.

Atam a·basokbao ta·buringko ritgope,
Cha·arijok noktango bi·sa·desa okgape.
Samjak·me·su ritako okgapatna cha·ani
Okchirippet dakako nikjok bi·sa·desani.

Mia·merong rongsaba rongjanggiko sikjajok,
An·gil ching·kalgipaba dengdobikbik dakajok;
Ja·a jakgolangsijok bi·sa oktongsisirang,
Gren·guasu nagaljok bilgilari ba·rangrang.

Te·brong bite rongrongte nike ku·chi minoka,
Ku·chi mittap nitate ake cha·e nimana.
Tokchang·tokchang samtangtang songna dukni sokbajok,
Da·nang saoba- saobarang wal·ko·chikon sikjajok.

A·ki·a·sal jimgijao samsi chagija gita,
An·gil daknanggipako kini rokgimin gita:
Bimang manggisi gita bibal bari jatchio,
Gangma minenga gita mikkang sona bibalo.

Pattigimin mandena rippingchina nimakon,
Mite- Misi-Saljongna Kamal wachi tatjakon;
A·songari wangdate cha·gipachi pakmakon,
Chasong rikit wa·rame gisik do·tekmeakon.

Pattigimin rasongko mande a·nangatjokma?
A·song·kosi gimiko marang jo·oldapjokma?
Ong·atgimin rasongna ringrang mesokanima?
Ringrang Ritimkarina mande kiratcha·jama?

60 GUALANI

1

Mande a'gilsako
Gualanirangko
Chagronggija
Ong'na amja.
Gualania
Mandenin ong'a.

3

An'tang gualako
Nikahaon uko,
An'pilani
Ong'a gelani ;
Uno ga'chate
Dakangbo nambate.

2

Gualgijagipa
Chusoksranggipa
Janggi tanganiko
Grongkuja uko.
Guale, nama
Skianiko man'a.

4

Gualao sripe
Na'a gimanabe ;
Gualao pangchake
Re'babo chakate ;
Nang' gualani
Ong'pilgen pattiani.

—o—

61 ONG-BEWALRANG

1

Pilak a'gilsakni
Ong'bewalrang,
Ong'a kenna nanggni
Kakketoba uarang.

3

Wa'alni bewala
Kamanian.
Gittang gisi inja
Kame bon'attanian.

2

Dongja ka'sachaka
Pang'a jolan,
Ong'a bewal gita
Bilsi an'ajoljolan.

4

Chini bewalara
Balboani,
Dal'a, chona mingja,
Wai! sripe siatani

5

Ia a'gilsakni
Ong'bewala,
Plakkon dapani,
Jekoba gope gala.

6

Ong'bewalni bichal
Kakket ong'a
Manderangni bichal
Ka'sa, mikang nia donga

—0—

62 SING·SOGINOKNE

1

Chanchiatmana bon'kaman salo
Bichalba donga ina salgio;
Maiarangko sing'gen un' salo,
Sokangoa, APPAN' Kurio.

2

Sing'genma, "Badita man'baaha,
Gipinrang nang na maiko on'aha?"
Ong'ja, sing'genkon, "Na'ara,
Maiko sarangna on'baaha?"

3

Sing'sogenma, "Sakosan chebaaha,
Ingrik, jegrik, dakgrike, ambaaha?"
Ong'ja, sing'genkon: "Na'ara,
Mai nama kamko ka'baaha?"

4

Ba sing'genma, "Maiko cha'ba-ringbaaha,
Ba'ta na'a ka'sroke tangbaaha?"
Ong'ja sing'genkon; "Na'ara,
Ba'ta angna duk chakbaaha?"

5

Sing'sogenmasai, "Dala mandema?
 Man'e cha'ama? Glsik gngam?"
 Ong'ja sing'genkon: "Na ara,
 Sarangna dangdike on'baaha"

6

Sing'sogenkone iarangkode;
 Aganchukna man'giparangkode.
 Ingen, "Re'ba, rasongona,
 Kamtangtangani neng'takna."

— o —

63 A'BA WATA

1

Salo salgimik-gimik
 On'e bil jak, gisik ;
 Janggil mium rame,
 A'ko jaksi ote ;
 Mikka bitchi ringe,
 Ruat nade gane ;
 Gama and nggipa.

3

Indioba sala trimtrim,
 Napangenga srimsrim ;
 Nang a'ba watna,
 Salna a'ba chotna;
 A'ding salmiriao,
 Chengchengari mikoo;
 A'kong bolgrimrango.

2

Attam salaiango,
 Dikmeattam channango;
 Salna ka'a amrikja,
 Dakna bil sokrikja ;
 Da o pangs-a-pangsa,
 Dro dng'a dng'sa;
 Gama and nggipa.

4

Gamgipa a'ba watna,
 A'batang niwatna
 Katcha jakimatang
 nikna ;
 Do'butok butokange.
 Do'bret a'ba reape ;
 A'ba watna nangnajok
 Sala re'angmanhajok.

5

Katchaa a'sechi knana
 Matchakchakana,
 Dadrak gakgakana,
 Mangwak wakwakana;
 Uarangba salko
 Mesoka, re'angako;
 A'ba watna namako.

6

Gama a'ba wato
 E sal matchok nachil
 Jikgipa chitkua;
 A'se wa'nok wa'ding
 Segipa den'kua;
 Re napbaja jakari
 Nokchina indinari.

7

Balana balwa srisri,
 Nike mi gongmriri,
 Gisik an'sengriri;
 Gamgipan ka'teng katchaa
 Nikenba mi misi nambaa :
 Aia ! ka'pakbaa a'batang
 Re'baoba nokjamtang.

—o—

64 BICHAL SAL

1

Nikaha anga dal'gipana bokgipa singhasonko
Enia uno asonggipa, Ba'brani mikkangko.
Uni mikkango a'gilsak jiljo, salgisak riro'
Mo'ha a'ning-a'sik bikbo bikbo, kosako kimko
kimbo.

2

Nikaha anga re'angsogimin, sigiminrangko,
Dal a, chona singhason mikkaango chadengengako;
Ba'bra janggini ki tapko o'ha,
Sesogiminrang gita, bichal ka'aha.

3

Nikaha anga, sagal antango sigiminrangko,
Ba'brana on'atgilenga antangogiparangko.
A'gilsako janggi tangbaa gita,
Bichal cng'jok sakantikon kamtangtang gita.

4

Nikaha anga, a sakni papi toromirangko;
Dingtanggrikataha do'bok enia mesrangko.
Napangaha toromirang jringjrotna salgio
Enia papirang jringjrotna wa'alni wario.

—o—

65 KANGAL ENIA NOKMA.

1

Kangalni donga noka kolgipu,
Nokma mandeo donga noka, jama ;
Cha'na dongja channa me dikku,
Nokmao donga cha'na nama-nama .
Dongako cha'e tom-tom tusia.
Gam gnanngipa tunapja gamina chanchia.

2

Kangal da'nang ! jag'ki dimitaia,
Man'e cha'gip'ni nek ringrang-ringrang ;
Maiko dakger sone balmitaia,
Kratcha'a nikate, nokman padang-gadang.
Indiba, kangal donga katchae,
Nokmade dongsiksakbea. Mainasai ?

3

Tosok dongjae, ana matbigil.
Tosusana dongja, Nol mani turam ;
Gombolba dongja, pina bolbigil,
Nokman' gombol kimit, ong'jasa ramram.
Kangal mande an dila sin ana,
Nokma mandeba an dila kenana.

4

Gama jaktang mikku bitchi ringe,
Dongja arate, Nokma mande gita ;
Watja a'ba ruat nade gane,
Ong'ja salak, wachina kengipa.
Man'a mi-misi, gam-seng bil'tango,
Pangchakaija nokma gita, gipino.

5

Kotaptape gana ba'ra busru,
 Nokmadrang gita ganja ilang-ilap ;
 Da'nang ! De'drangba ganaia chotchru,
 Patnade sikipabea gana chingchap.
 Kangal nokman' dedrang nika apsan
 Ku'si onge kalgrika, roa damsan.

6

Tusia wa'se kolgipuaiao
 Balsrangrang, Nokman nokde sitip-sitip ;
 Dongaia nokking janikaiaó
 Pangsangsang, ong ja da'nang ! Mitip-mitip.
 Kangal, Nokmana donga neng'ani,
 Ka'sao dakchakgrike, onga dongani.

—o—

66 MITAKA

1

Maiko minga mitaka ?
Uan namgija daka,
Katta song'dapa,
Ong'gija man'dapa.
Ripeng noksul kajia dakata,
Ma'drang songsul bobil ong'ata.

2

Altubea mitakna,
Mande gipinko takma,
Dosio galna,
Gipin' mikil palna.
Indake daka me chik gisik gri,
Tol'rongbea mande mikil gri.

3

Agana mitakna,
Nangja leka-poraina,
Man'aia tol'na,
Altubea solna.
Mitakgiparang : skia man'rongja,
Mandeskarangna chanchia bang'rongja.

4

Gokasa mitakgipa,
Ong'gija agangipa ;
Taning donggija,
Chanchia ong'gija.
Mitakpaja seng'gipa manderang,
Tol'paja gisik gnanggiparang.

5

Namama mitakara,
 Ong'gija aganara?
 Cholon namjasa,
 Dakbewal ong'jasa.
 Indakja da'nang! Namgipa mande;
 Torom, mikkim gnaaggiparangde.

6

Uibone mitaka,
 Golmal, kajia daka;
 Jegrik, dakgrika,
 Bobil ong'grikata.
 Dongaibo agangija gipinko.
 Ma'jahaode uni namako.

—o—

67 ANGNI NOKDONGRA

1

Wal'ku gongmik-gong-
 mik
 Gongga nokkingsako,
 Katchae nokgimik-gimik
 Ka.dingtoka attam soko;
 Angni nokdongrao.

2

Nichaksoa angna
 Re.bagen basako,
 Katchasoa nikatna
 Ga'dikeahaon saraka.
 Angni jikgipa.

3

Rama tongsanon
 Chadingdingsotoka,
 Cholura sokhaonin
 Chae, rim dingdingso-
 toka,
 Angni dedrangba.

5

Noko kasagrika
 Saksa sakgipinna,
 Ripeng noksul stitgrika
 Saa-ata hokgipinna;
 Donga nangrime.

4

Agana ku'chimit
 Jika sea kachae,
 Nokdang mikkang ka-
 dingsmit
 Nika mikkang ring-
 rang ching'e;
 Nokni pilakkon.

6

Sagipa-ding'gipa
 Nia, Sanna-banna,
 Songa jawa nagipa
 Soka chaka, sing'a-sanna
 Nokni maderang.

7

Rikgimin dokdongra
 Tomtom katchae chakram,
 Dongimin dring nokdokra
 Brenba re-na neng'takram,
 Du'un mejarena

—0—

68 CHU-ONGNIKANIAN

Terwaldsen mingsingbegipa
Kima sol'na changbegipa ;
An'tangni nikgimin jumango
Jisu Kristoni binangko
Sol'engachim ro'ongui kimako,
Ian aiao inmanpile nitobachim
Enia uko matchotna gittobachim.
Indakenba pilakkon name
Niengachim sulsul rim'ama
Uno chacha uni ripeng seksa
Re'bae dongeaha un' bak'ya.
Terwaldsen grapaha rang'wikan
Ripengtang uijaha mui ong'aha gikgitakin.
Uni ripeng pakkreo doitope,
" Mai ong'aha ? " me sing'aha toptope.
Ua mikgrononiko mikchiko opake,
" Kema ka'pabo, " inaha uco pipake
" Ripeng anga kimako namen nikaha,
Namdepatna gita namen nitaitaiaha ;
Indiba, m'anjaha nangdapaniko
Anga am'beahaoba namdapatniko
Angni gisiko kalimani IAN,
Angni ka'tongo CHU-ONGNIKANIAN.
Angni uia, sapa enia changa
Nibo ! Namdepatna mun juenga,
Champengjok CHU-ONGNIKANIAN.

—0—

69 NANG·NIN GTCHU

1

Dawiljangjang jarambong
Wakginde kingsani,
Walni gitel duramong
Teng'atenga sakoni.
Chanchiman'a pra·dimbra, noringro-nojingjo,
Sako teng.enggipa gitchoe, bingbo-jingjo.
Nang'nin gitchu.

2

Nabaa ringrang·ringrang
Amsoja nichakna,
Ding·baa nanghang·dangdang
Salak raka an'chakna.
Chanchiman'a pra·dimbra, pilak salni dedrangko,
A'o, sako, chio ; a'dinggipa ma'dangko ;
Nang'niō gitchu.

3

Planeo do·reng gita,
A'gisin' kosakko
Bilango do·ma gita,
Ae·dltema'n' chisakko.
Chanchiman'a, uarang aiao inmanpila,
Ba'bran dakgimin a'sak chanchisokjapila.
Nang'nin gitchu.

4

A'brī, buring bolgrim,
 Silang rong'ma dare ;
 A'kawe, bakra, samdim
 Enia sriwil a'sare.
 Chanchiman'a balenggipa pilak bibatrangko ;
 Ma'manti nangenggipa bolte-biterangko.
 Nang'nin gitichu.

5

A'ning, a'sak gapa
 Tangka, sona, gamseng;
 A'ema-ditemaogipa
 Chata mukta, ro'ong, an'cheng.
 A'bani mi, misi pilak ge'a-galarang
 Enia matchu, do'bok, do'o jila-alarang
 Nang'nin gitichu.

6

Aslik, jong'memarang
 knabo jikjak-jikjak.
 Kail Chibrim ajengjorang
 Roa, mala jirak-jirak.
 Chanchiman'a, donaha katochaaniko skine,
 Nie uichina, donga jakmaosa patia.
 Nang'nin gitichu.

7

Do'kru do'rek do'chelu
 Ring'enga bolgrimo;
 Do'si, do'pit, do'menggo
 Mikoenga samdimio.
 Bilrroe do'riting, do'reng-gakasi,
 Gipinrang diltu bolgrimrango ka'sri—kasri.
 Nang'nin gitchu.

8

Mongma, matcha, singho
 Ken'gni matburingrang;
 Matma, matchu, noko jila
 Namgni mandena uarang.
 Chanchiman'a dona, asakko a'dingatna
 Jila-alarangko; mandeko an'sengatna
 Nang'nin gitchu.

9

A'sakni songnokrang,
 U'rangni rajarang;
 Rakkigipa kotokrang,
 Pilak sason ka'giparang.
 Chasongni chasongna uarangba ong'baenga.
 Na'a an'tangni ska-namnikao donbaenga.
 Nang'nin gitchu.

10

Pilak mande, a'song,
 Rajarangni mikkim ;
 Ong'baa chasong chasong
 Pangrake, nang'on kim'kim.
 Mittel-mitchuani, mikkim, mandera'ani,
 Biljak rasong, kakket-bichal sason ka'ani.
 Nang'nin gitcheu.

—0—

70 PE'E GALBO

1

Namgijagipa bewalrangko
 Pe'e galbo chonengon,
 Brikapgimin bewalrangko
 Pikmanjawa dal'ahaon.

2

Dakgitalgipa bewalrangko
 Na'a mikraksoode,
 Dal'atgija uarangko
 Pe'na amgen simsakode.

Bewal damdeon a'bachenga,
 Nama, ba namja ong'chong ;
 Chonaonisa ong'bachenga,
 Chona, ba dal'a ong'chong.
 Namgija bewalko pe'na am-t-amgijani,
 Uni kosako nang'ni gitel ong'ani,
 Nang' jakon, nang' bilon, nang'ni cheani.

--o--

71 GAORA

1

Gaora chambuk gita,
 Mesokaia salgrokosa ;
 Pilaknan chubatnika,
 Nikaia an'tangkosa.

3

Gaora boldoreng gita,
 Goldengdeng ; dongja
 salakkim.
 Nongjaoba rasong daka,
 Dengjaoba rasong mik-
 kim.

2

Gaora kim'bik gita,
 Nokkingop daka
 konggranggrang ;
 Pilakkon uigimiknika,
 Ong'aioba kongbang-
 bang.

4

Gaora boljagro gita,
 Balwa jakra kambe
 pe'a ;
 Gaora rasong gra daka,
 Kratcha'a mikil be'a.

--o--

72 BALWA

1

Raka balwa raja,
Aganao katta ra'ja;
A'rako kil badinga,
Wachio na'gil kaa.

3

A'ningchi balwa-balwa
Misrchi balwa-balwa;
Uko agantoka
Ka'dingmisitoka.

2

Bilgittingmangmangde
An'tangnade dongpara
Mikkang bimangmang-
mangde
Wilwilana batpara.

4

Dal'uika an'tangko,
Chonnika gipinko;
Dal'a-raka miknapu,
Rong'ma re'su be'dapa.

5

Re.o dimu rippang,
Agano gingsi rippang;
Nikato Matcha mikkang,
Re'pako do'bok merang.

—●—

73 RIPENG

1

Namgipa mandeko
Ripeng dakna nama,
Na'a je mandeo
Bebera'na man'a.

2

Ripeng mande ine
Na'a ka'dongna ama,
Sadu, sade ine
Pangchaksrangna ama,

3

Ua nang' namako
Namedaken ma'sia,
Nang'ni bilgrio
Ka'sachake nia.

4

Angni ga.akao
Jakko snile dakchaka,
Kalimani salo
Angko katchaata.

5

Gipinrang mikkango
Namakosa agana,
An'tangni nikako
Agane mesoka.

6

Gipnrang mittino
Ka'dingnape rooba,
Jedake mikkango
Agana unoba.

7

Nanga soka salo
On'a biljakkoba,
Jajaani soko
Ku'pattianikoba.

8

Rasong napo-be'o
Gipinrang kal'stapoba,
Mikkim ono-chon'o
Chonikja unoba.

9

A'sak uko saksan
Janggilate galoba,
Donga watgalgijan
Una je ong'oba.

10

Nang'ni nangan salo
Ina dakchakna nang'na,
Angni nangan salo
Dakchakskabo angna."

11

Chanchironga pangnan
 Siani salo apsan.
 Inronga watgijan
 Napan salo damsan.

12

Ripengni katchaao
 Pangnan katchapaa,
 Uni kalimao
 Apsan kalimpaa.

—o—

74 PANGCHAKANIO

1

Dongo pangchakanio,
 Nama miksonganio
 Enia chanchibewalanio ;
 Janggi tangani rakoba,
 Kena-moani sokbaoba ;
 Aram nalsachi salko uie,
 Balpakangenggipa balko nike ;
 Ka'dongsoa salni teng'anina,
 Nichaksoa gisikni an'senganina.

2

Janggini bal jrimbeon,
 Ka'donggijani nabaon,
 Duk-michi jimdapon ;
 Pile sal namanina
 Enia mikka tipanina ;
 Nambata janggi tanganina ;
 Bi'kugen nang'on anga,
 Na'an ka'sagipa ong'a.
 Maina nibo : Na'ara
 Ong'a angni Ba'bi'ra.

—o—

75 JISUN ATCHIO

1

O Salgio donggipa Ba·bra
Anga nang·ko mittela,
Chanohio nang' ka·sara
A·sakna Kristo re·baa.

2

Pilak angni ripengrangko
Gisiko ra·atman·a
Chel·ao, sepango ma·drangrangko
Anga chanchiatmana.

3

Salni noksik, A·ni ki·tik
Kristmasna a·dinga,
Donga noksik, songni ki·tik
Katchaana ka·dinga.

4

A·gri · chigri, kangal·cholgri
Am·e ra·chaksoa,
Me·chik·segri, disa·ma·gri
Katchae nichaksoa.

5

Ma·a·pa gisiko chanchia
Ba·ra·kancha ra·pana,
Bi·sa·disaba manchia
Kristmaso gital ganpana.

6

Gam'a songanti knaa
 Dama doka dau-dau,
 Nokanti jakkepna, pittana
 Pura su'a tau-tau.

7

Paja pina sam-bol bijak
 Attam, wal walsengna ;
 Pante ne tra chroka jrakjrak
 Kristmaso an'sengna.

8

Ra'a boma, pottokkalai
 Songa-noka knasengatna,
 Puljari, tamasa-deslai
 Chroko so'e jasengatna.

9

An sengtoka pante me'tra
 Chroke songkitik-songkama,
 Napjoljola sara-nokra
 Bilprak chroka jinma-jinma.

10

Botlehemni Jisu Bi'sa
 Re'baa' an'ching songrangna ;
 Jokatgipa, Uan Raja
 Ra'chakgipa Ka'tongrangna.

—o—

76 RASONG

1

Rasong, rasong, rasong
 Aganbaa chasong-
 chasong ;
 Rasongon cha'a-ringa
 Man'baa mande minga.

2

Rasong, rasong, rasong
 Agana, "Dongode
 rasong
 On'gen, p'lakkon
 angnaba
 Misi Pattirakgipa."

3

Ina, "Rasong rasong
 Dongjasa angode
 rasong,
 Angnade pattipaja
 Saljong Kontirakgipa."

4

Rasong, rasong, rasong
 Dongama on'gipa
 rasong?
 Mikkang nie on'gipa
 Pattibingbangaigipa?

5

Rasong, rasong rasong
 Bebera'ja anga rasong ;
 Dongjawa nichakari
 Rasongo pangchakari.

6

Rasong, rasong rasong
 Ong'gen nang'na, angna
 rasong ;
 Nang' jakma gamuosa
 Ang' a'ba ba'kuosa.

7

Rasong, rasong, rasong
 A'gilsako ong'gen
 rasong ;
 Raka misilgijana
 Neng'a anpilgijana.

8

Rasong, rasong, rasong
 Chanchiaigipana rasong,
 Indiode re'bajawa
 An'tangande nabajawa.

—o—

77 NEPOLEON

1

Danang ! pante chadambe,
Gipin niondapa kambe;
Dongpaosaming nokde, jamde.
Roa uko kal'stape, ho'e;
" Napoleonde mande bone,
Che ! Ma'ming tuanakone
Chu'dapsiko, wene ko'ne. "
Aiao ! Nepoleon kratcha'a,
Ka'onanga, bika-chaa;
Chakna amja ka'tong chichaa,
Sia-tanga uigija chaa.

2

Nija an'tang-gipin bil
Uija, de'a gol; ba sil,
Dakrika bikpil-bawil;
Ga'akoba teng'chapteng'chap,
Beng'oba peng'tappeng'tap,
Watrongja sikaptangkap.
Bika rong'te gita,
Jakpong rimol gita
Kenja dal'a raka,
Namgijako chena-taka;
An'tangko mesoka bata

3

Nike uko mikchepa,
 Chonnike sikchepchepa,
 Dokaba dokchepchepa;
 Indiba dakaia Ketcha,
 Do'bipa gita gangchscha
 Taka bobil kata-katja.
 Kena una chasongska,
 Dal a, raka songska;
 " Napoleon nawang, " aganskaa.
 Nike uni ka'donga
 Gipangaha mande minga,
 Songo, noko mingsinga.

4

Bi'saonin chonnika man'e,
 Re'baaha bobil dinge,
 Amgipa, ohogipa ong'e.
 Chanchiaha an'tang' song,
 Ripeng, mande, chasong ;
 Dakna, man'ode rasong.
 Sika gipin gita chupana,
 Mande chonoba, dal'pana;
 Maichibade mande ong'pana.
 Miksongaha sipaio napna
 Kotokni dilgipa ong'pana.

5

Niatna jakpa nigipako
 Am'aha changgipa-sapgipako,
 Gisik-a'ning-bitgipako
 Aganchina an'tangko ;
 Mingsinggipa ong'genma,
 Jawa mande minggenma,
 Biming a'song gipagenma ?
 Jakko sale niaha,
 Mikking pattal nikaha;
 Ua nibingbangaiaha,
 Sko piwingwangaiaha

6

Jakpa piltai niaha,
 Mikkang nie inaha,
 "Agana nama ong'ja:
 Mande mingna dongja,
 Tanka, sona dongja.
 Rasong, mikkim on'ja,
 Mingsingani nang'na ong'ja.
 Nang'ma nang'pa kangal
 Dongja noko rang-mal,
 Ong'ja nang'na dal'na bewal.
 Dongja mikkango sala'
 Nioba jakpao den'a,
 Nang'ko mande mingna"

7

Ka'dongsoa gita ong'jae,
 Re'pilangaha ua, kratcha'e;
 Indiba, inaha chanchie,
 "Maina mande mingjawa?
 Champengna angko man'jawa,
 Krengako anga watjawa,
 Mingsinggijan ong'jawa."
 Ra'e tonual jaktango,
 Ratataha jakpatangko.
 Dakatna rasongtangko,
 Mingsingatna an'tangko.

8

Re'ange jakpa nigipachina,
 Mesoketaiaha nipachina,
 Kattatangko ra'pilchina,
 "Ang' jakpako nibojok,
 Skang gita, da'a inbojok;
 Da'ode den'a, sala dongjok,
 Angaba mande ong'nok,
 A'gilsak angkoba mingsingnok."
 Uni miksongchongmotana,
 Mande ong'na sikchongmotana,
 Nikaha, man'gen mande ong'chongmotna.

Kim·kim dongako miksonge,
 Uni chanchiako nike ;
 Ua aiao inmanpile,
 Agantaiaba chanchipile.
 “ Napoleon, nang·ko minggenne
 Franceni saksa mande ine,
 Nang·ko minginggenne
 Agilsako mande inige.”
 Ia kattako man·enba,
 Re·angaha gisiko donenba,
 “ANGA MANDE ON·GEN,” inenba.

78 AMASA

1

Pangnan nisenga
 Ka'tong dongtogija
 dake.
 "Walniangpilengaha,"
 Agane, nichaka.
 Sawa daka indake?
 AMASA.

4

Walangsrangoa
 Ka'a amja ka'sik-oksik;
 Sengnapangjaoa
 Grapsik mikosik.
 Sawa daka indake?
 AMASA.

2

Ka'tong sengnapja
 Gisiko chanchirikita;
 Dongoba dongnapja
 Che! sintirikita.
 Sawa daka indake?
 AMASA.

5

Re'basrangoa
 Ka'tongo gape, katchaa;
 Manenge insoa,
 "Bachi mai dakchaa?"
 Sawa daka indake?
 AMASA.

3

Cholgugachiko
 Nichaksoa niwat-niwat;
 Rama dilmachiko
 Daksoa chawat-chawat.
 Sawa daka indake?
 AMASA.

6

Anga chanchia;
 Amara daka mainasa,
 Indake sintia;
 Ka'saako uijae.
 Sawa daka indake?
 AMASA.

—0—

79 DA·AL

1

| | |
|---|---|
| <p>Uibone Da'al Gisik gnanggipani sal ; Indiba kinal Goka manderangni sal. Da'alko watenba, kinalna nichakenba, Man'jawa ukoba.</p> | <p style="text-align: center;">3</p> <p>A'ba mikkang done, Gisikgri, goka mando ; Donggen asonge, Be'en sagija dake. Inronga aratenba, "Salara dongengaba, Kinalan man'aigenba.,'</p> |
|---|---|

2

| | |
|---|--|
| <p>Jakma jako done, Gisik gnanggipa mande; Dakgniko nike, Dongen da'alón dake ; kinalna sengchaenba, Salko salmanchienba Dongjawa uade.</p> | <p style="text-align: center;">4</p> <p>Gisik gnanggipade Da'alni dakgnikode Da'alón dake Chu'sokatgen uade. Janggi tanganioba Indake dakgipaca Ong'aigen mandeba.</p> |
|---|--|

5

kinalna chanchie,
 Dongaigipa nisenge,
 Aratmisie ;
 Goka mande, uanne.
 Ong'gen da'alba kinal,
 Apsan kinalba kinal,
 Ong'angaigen kinal.

— 0 —

80 ANG' SONGDE

1

A'song-chigə kongjimjim nika,
Chiring rama gongdingding nama ;
Chiringga a'satpara boksogim,
Sara pattal rongtalpara sapojim ;
Gittim sara baljokpara,
Songa disa an'sengpara.

2

Songa, noka an'sengseng,
Sara, nokkra chijengjeng ;
Sone do'mik tingriting keppara,
Gittim sone do'patchi sa'para ;
Gittim sorok tallengkit talpara'
Songa rangel koripok pinpara.

3

Chiringga rongtalpara prikjang,
Gittim balwa nangpara balsrang ;
Songa wakki gongatja,
Chiga kini dingatja ;
Nitoa pul bibal balgitorang,
Misariba, balwa ba'lo riprang

Nokking wal'ku gongriting gongpara,
 Songa me'dik te'rittak changpara;
 Attam e'sal cha'spa galtokpa,
 Gittim pura gaprittap su'tokpa;
 Gisim, gitchak; ba'ra illing-illap,
 Ganpara bi'sa-disa ching-chap.

—o—

81 KA'ONANGA.

1

"Ka'onango maiko dakja,
 Okkriao maiko cha'ja."
 Agana Katta mancha;
 Simsakna nangmanchaa.

2

Ka'onango mikkang dingding,
 Chanchia kosak gilgil;
 Ka'onangani mikkang, katta,
 Bate mandeko ching'chaata.

3

Ka'onango ka'saa gisik
 Dongrongja nama Ku'sik;
 Gisia, saoa, jegrika,
 Indin ku'sik gimaata.

4

Ka'chaa ong'a wa'al,
 Ching'chaa dongo gisik andal' ;
 Maina gisikko jada changata,
 Enia mandeko goka ong'ata.

5

Ka'onangako kimitna gita,
 Ong'a ka'saani Katta ;
 Ka'saa, chakchika, ton'toma
 Mandeni gisikko so'oma.

— o —

82 APANI GE A AMRIK

1

Apani ge'e donanga amrika,
 Chokchim-chokchim bite nangrika ;
 Nikenba, apako gisik ra'a,
 Rittak-tottak mitchi ga'akata ;
 Nikjahaoba da'o, nang'ko bimango,
 Dongkuenga tange' na'a uarango ;
 Tangkueng ang' gisiko, jumango

2

Pilak nama jakma indake,
 Dongkama jama pangrake ;
 Manden a'ba-ba'ku, jakma-gamu pangnan
 Takkirika rasong chasongrangnan :
 O apa, na'a ching ka tongriango,
 Dongkuenga tange, nang' dedrango;
 Nang' namako uganenga songo.

Sila amrik bijime-an'sike,
 Bite chokchime-chamsike;
 Mikgronna ninanga rimitbalbal,
 Bibal balenga gita gitchaksalsal.
 Bitena nang' cheksirang gongdola,
 Nang'gitan nama manderang sontola;
 U'mango dongkama katchaa, tom'toma.

— o —

83 SINKARINANGNANG

1

Bilsima pangpilbajok,
 Karima chugurongjok,
 Salna guri dinbajok,
 Bring ripamchibajok.
 Ripamchi tottak-tottak ga'akjok,
 Gurima mitmat-mitmat dingatjok.

2

Pring salgimaa g'irina,
 Salgop pina surina;
 A'kongo rikrak chibima,
 A'dingo mitmat gurima.
 Nangba chini bite samsina,
 Dobaa na'tok-na'bat warina.

3

Bolmao ringring Gantiba,
 Ramao sring' jong'dompa;
 Gittim an'seng baljokba,
 Songa jikjak daktokbaa.
 Sara wal'tim choritchet sikbaa,
 Kangal am'pak tekrittak dokbaa.

4

Cheng'kotta tua bang'kite,
 Aslik gana dangkite;
 Gikchru sam rikkite,
 Jong'dol-nating ga'kite
 Roba bi'sa pagiri an'senge,
 Me'chik disa segiri baljoke.

—o—

84 WACHINANGNANG

1

Salan tektek,
 Balan hoho
 Raka balreroo:
 Bolni hijak,
 A'ni samjak
 Ran'a jrak srodakdak.

4

Rong'ko tate,
 Churudape
 Ina, " Jime, gipe
 Ai-roktak
 Wachi-toktak.
 Waba rittak-tottak.

2

Bolgrim srangdang,
 Ding'a hangdang,
 Daka hanghang-
 dangdang.
 Sako srisri
 Do'reng Gakasi
 Mikoa ka'sri-ka'sri.

5

Jakpa riprap,
 Mikka delap
 Sako riprap-riprap;
 Mikka simeim,
 Gam'baa grimgrim,
 Wabaa dimdim-timtim.

3

A'ni korang,
 Sakni do'rang,
 Made mathuringrang;
 Nanga sokchi,
 Chi, ripamechi,
 Mikka wachin' bitchi.

6

Similbaa
 Mikka biba,
 A'ni biba chabaa;
 An'sengnika
 A'gengipa.
 Man'gipa, cha'gipa.

7

A'ba wea,
 Gama ge'a.
 Sokea - gaea
 Wa'a bola
 Sokgitola
 Chiring-chichol dal'a.

—o—

85 SONGREGIPA

1

A'gilsakni mande sakanti
Ong'a songregipa,
Re'enga salsalanti
Dondik, dongdikgija.
Noktang-aptangna.

2

A'gilsako pilak manderang
Sonregiparangsa,
Janggi tangani salrang
Ka'sae on'giminsa
Namako dakna.

3

Dikdiksana ia a'gilsak
Chingna ja'nengtakna;
Jringna dongram salgisak
Dongkame neng'takna,
Pilak gamgipana.

4

Dal'a·chona mande sakprakprak
Re'pakengmitingon;
Ka.bo am'e mingprakprak
Janggi tangmitingon
Nama jekoba.

Re'baja changsana agrede
 Re'bapiljawaha,
 Mandeskana dakgniko
 Dakmantaijawaha;
 Da'on dakboaha.

—0—

86 MITCHIBO

1

Mitchiakon mitchibo,
 Gelaba gelbo ;
 Namja jeko minga,
 Kraja jeko ina ;
 Namjane, mitchibo.

4

Mitchiakon mitchibo,
 Gelaba gelbo ;
 Ku'danggni dakako,
 Miksamgni niako ;
 Namjane, mitchibo.

2

Mitchiakon mitchibo,
 Gelaba gelbo ;
 Nampinikaniko,
 Kakketgijaniko ;
 Namjane, mitchibo.

5

Mitchiakon mitchibo,
 Gelaba gelbo ;
 Tolmikmikaniko
 Dakmikmikanika
 Namjane, mitchibo.

3

Mitchiakon mitchibo,
 Gelaba gelbo ;
 Mikbokrakkaniko,
 Cha minokaniko ;
 Namjane, mitchibo.

6

Mitchianikon mitchibo
 Gelaba gelbo ;
 Mikil grigipako,
 Torom grigipako
 Namjane, mitchibo.

—0—

87 DA'A KENA NA'A

| | |
|---------------------------|------------------------|
| 1 | 3 |
| O mande: | O mande: |
| Da'a kena na'a, | Da'a kena na'a, |
| Dongja sia ina: | Sikdikdik ong'ana; |
| Bimang dingtangata, | Salgini sa'grerangan, |
| Mikkang rongchinga; tasa; | Uno teromirangan, |
| Katchan' songo napna, | Sengsoenga nang'na; |
| Salgi nokdonggana. | Kristeba rimchakna. |
| 2 | 4 |
| O mande: | O mande: |
| Da'a kena na'a, | Da'a kena na'a, |
| Gopram andalana | Agittal ong'ena; |
| Dongja andalaniba, | Ong'ja gipin a'songde, |
| Mamingna kenaniba; | Toromigipanade. |
| Ba'bran senga ong'a | Ulo an chingnanba |
| Na'a knakujama? | Dengsoenganaba. |

— o —

88 DAKMIKSONGA

1
Manden' dakmiksongarang
Ong'a salgin' askirang gita,
Pilak nama chanchirang
Ong'gen una jarikanirang gita;
Donbo dakmiksonga.

2

Manden' dakmiksongarang
 Pangnan chu'soksrangna amjaoba;
 Dontonggija tikkelarang'
 Jaksoke, jakotsrangna man'jaoba
 Donbo dakmiksonga.

3

Manden dakmiksongarang
 Ong'gen uko rama dilgipa,
 Sokbaon duk, andalarang
 Sagalo chongipana aski gita
 Donbo dakmiksonga.

—o—

89 MIKGITOK

1

Mikgitok danang!
Uija mai gnang
Uni sambao;
Bibal nitogipa,
Sal nabagiga
Uija mai daka.

2

Gisik gri goka
Mikgitok uaba
Chanchining'jae;
Ba'brani dakgimin,
Uni on'gimin
Uija chanchie.

3

Nikoba nikja,
Knaoba knaja
Uiani gri;
Namako mingja,
Namjakoinja
Daka mikgil gri.

— o —

90 SONGGIGRIKA

1

A'chik Pagitchamrang,
Donga Ma'gitchamrang
Agana, Resona-Rejanggi ;
Donana Jamana-Janggi.
Bikon minga Deo Man'gija
Enikosa Salo Angija ;
Mandena dakchakgipa,
Jamana chel'chakgipa ;
Nionchokgipa, Ja'chelugipa,
Gitok de'gipa, Nachil songgipa.

2

Sananggija sao,
 Ding'nanggija ding'o,
 Abet-Rengge-Dudu-Ja'srang
 Rime, sale nio
 Wagam gitchak mesoko,
 Sre otrenng otato ;
 Songa-noka wal'joko,
 A'ba jama chijoko
 Okama Resona Rejanggiko,
 De'o Man'gijako, Salo Amgijako.

3

Rimol silchang
 A'o su'change,
 Be'en do'ga
 'Tangko salpenge,
 Okama ; " De Resona,
 Bakbakai ! De Rejanggi
 Dakchakpakubo,
 Chel'chakpakubo.
 Nionchokgipa niatpakubo,
 Ja'chelugipa kinachakkubo.

4

wagam gitchakko,
 Sre otrenngo
 Dokomdolkubo,
 Sikgomdolkubo,
 Kinachakmangmangodo
 Grongchokchokko,
 Ku'dambokbokko
 Nang'nan den'gni,
 Nang'nan on'gni."

5

Resona-Rejanggiwai !
 Misi rongjanggiwai !
 Songa-guare, jama janggiwai !
 Noka salakkim, jama jang'kiwai !
 Balwa mri balode,
 Sre otreng dol'ode,
 Gipinchina gongode
 Agana, "Da'odejok,
 De amangengjok,
 De man'angengjok

6

Dakchakpakubo,
 Chelchakpakubo,
 Watchangpakubo ;
 Kamchangatpaku
 Galchangatpaku.
 Nang'na watgiminko,
 Ku'pakgiminko,
 On'mangiminko
 On'susugenma ?
 Ru'pilkugenma ?"

7

Da'oa danang !
 Ka'sachakbebejok.
 Jama mignang
 Dane dongrikjok,
 Mese sa'guang
 Ja'delanggnok.

A'na cha'ko panggnang
Anga songgnok,
Salna do'bok okgnang
Sale den'gnok.

8

Wai ! Salgira !
Kai ! Songdura !
Nionchokenggipa
Ja'cheluenggipa.
Iakai, grongchokchok,
Nibowai, ku'dambokbok.
Nang'na ku'chakgipa,
Nang'na pakwatgipa.
Da'a aganbojok
Da'a jachabojok.

9

Ka ! Chalang !
Ka ! Goera !
Ian ku'chaka,
SONGGIGRIKA.
Ian den'jokne,
Ian engjokne ;
Ki'me samte ba'gija,
Grong a'mang nanggija ;
Ikgilo gam'atjaoba bipa,
A'keo a'matjaoba chara,

91 DIKKINI MAN'E CHA'A

1

Chengo Dikkimani salo,
Agana ua chasongo ;
Nareng pangdalengachim,
Cha'che a'kaengachim.
Achak karang cha'ako man'ja,
Do'o mikte nangako .nikja ;
Songa wakki gongitja,
Chiga kini dingitja.

2

Songa-noka balsangsang,
Sa'ra-nokkra chijangjang ;
Rika noka ja'a ritchasni,
Dona grimra sreka sotsni.
Dongruko am'pang rapa,
Matchikko sone kepa :
Tangkachi pakma dim'a,
Sonachi ketchi tapa.

3

Ja'pa ga'na ranggitchu,
Re'o ja'pa samangja ;
Gimin sikna ta'makku
Migiminna ka'saja.
Do'bimana rang chongchang
Noksamo kaa.
Achakma'na ba'marang
Andape pina.

4

Bolma songa a'dareo
 Dobachi duru wea,
 Sa'ra, rama chidareo
 Tangkachi sue goa.
 Duruna olmak kike,
 Stit chimonggipajok ;
 Warana jenti songe,
 Wanna wanchigipajok.

5

Sugipa ondingija su'a,
 Cha'gipa matchotgija cha'a ;
 Cha'che cho'dimdimako.
 A'sa a'dop o'mana ;
 Setti pake galako
 Bilsa a'chik domana,
 Songa noka jelako .
 Salsa re'e nimana.

6

Sokgipa a'na prapra,
 Cha'gipo a'na srasra
 Chu'dapsiko mibande nanga,
 Maljurio chijanggi tanga.
 Song'a guuria mibokbak,
 Ripamchia chitoktak ;
 Waka wa naachekekchek doka,
 Chua rongjo'a chekekchek ringa.

— o —

92 GISIK

1

Manden' Gisik
Jokenggipa chiring gita,
Chini chibisik
Tipchanggija joka gita
Ong'a chanchia.

2

Champengna amja
Jokenggipa ohiringgisikko,
Kimitna man'ja
Kamenggipa wal'gisikko,
Mande tangengo.

3

Pattoko dono
Nikahama John Banyanko?
Seatskaaha
Songregipani Songreaniko
Nikgimintangko.

4

Na'a knajokma
Mingsinggipa John Miltonko?
Mikgitokmancha
Seaskaaha PARADICE LOSTKO
Mingsingjok uko.

3

Man'ja an'jima
Enia kangal cha'asia
Mangkima'utna
Miksonga gnang chunchianiko,
Mandn' GISIKKO.

— o —

93 CHASENGA

I

Tira Noe Gittinga
Donga gittim songading.
Nitoa okgil te'minna gita,
Ku'chila naranggil gita;
Kni bitom rombakbak,
Ja'pa ki'tik te'rakrak.
Salmisi Askini dede
Nama da'nang nomilde,
Silla da.nang! mechikde,
Terokbalbal, rinokbalbal,
Ku'chila mandal bibal-bibal,
Danang! Noede Gitingde.

2

Me'tra grang chakchak,
 Chanchiaha pante ajak ajak
 Chujong Racha, jaktong gitchak.
 'Tangko ja ping chibokjimjim
 Nikaha sokme chijogilgil.
 Inaha, "Me'tra badi roginok
 Done sokme chokchok,
 Rendi badi dongpinok
 Nie ja ping siongbokbok.
 Angni Chujongracha, Donggara
 Dongjama kambe toa, Namara?
 Angnara! Nogna Gitingnara."

3

Tira Nce Gittinga
 Dakjok neko ardinga:
 "Apara sina changgijara,
 Amara mikron nikdo nangara
 Dongo doagnapbeakon,
 Nio ninapbeakon,
 Dea saksu dongakon,
 Sokmechokchok toakon;
 Na'ara, choligija apara.
 Nieda, mani Rongara' ba'ara
 Namajama, angni Chujong Rachara,
 Dongara angni, jaktong gitchaka.

Pagipaba inaha. " Noca Gitinga,
 Na'ara, atera dara jajrenga.
 Biri dingsagipaona.
 Gittani damisagipaona;
 Nang' mama Ringmanua.
 Re'angengi Girisichij biraona.
 Nangni mani Rangrako,
 Nangni no-sariko. inbana,
 Watichu Chujong Rachako,
 Nang' juktong gitchakko;
 Ia bilsin' Wangalaona
 Pame-mertan' balsalaona."

Wangaleri pringo Racha
 Sokchameah. juktong gitchaka.
 Ansena chidare ponglingding,
 Rama bala tadingding
 Nikeaha Tira Noe Giting,
 Kardingo wagam kitma serending.
 Saira patal chijengjeng,
 Noka-jama ansengseng.
 Salam kereu jaka rinokbalbat,
 Aganato kurang ka srokhbal.
 Dakaha salam kartaina gitik
 Jako sale kudimataina gitik

6

Sing'soaha, " Mama-manimangde,
 Namtokpaengama uamangde?
 Sa'amko de'e saldoe,
 Ba'ratangko andape,
 Inaha, " Asongbone, Namane,
 Ja'ne'gtakbone, Dongane.
 Songa-noka an'sengja,
 Noka-jama balsrangja ;
 Chiga knidingari,
 A'song wakkidamari ;
 Maiko, cha'na ino mia gri ;
 Dongja, ringna ino chua gri. "

7

Gitinga watnapgija watangna,
 Nokningcha re'napgija re'angna ;
 " Asongkubone, Dongane,
 Dongkubone, Namane, "
 Inaha, rinokbalbal ku'rangchi
 Niaha ka'sabean' mikgronchi.
 Ontisani ja'mano, waka bika donako
 Ra'baaha, chua bitchi chekako.
 Cha'na ino tojaoba, Dongasong,
 Ringna ino chi'jaoba, Appasong;
 Cha'e nio tojaoa solkande,
 Ringe nio namjaoa donkande.

8

"Na'ara, Namara, Dongara
 Kinasingsunganasa re'bara,
 Nikjagringanasa nabara.
 Nang'nanba do'a-waka ra'soa,
 Mama ada, chua-mia donsoa ;
 Togijako kadepe tepsoa,
 Chagijako momeke cheksoa
 Nikja Donga, nang' nama gitako,
 Tonikja mima nojima gitako.
 Mama ada gri saknisano ;
 Aganchengbo angna saksano ;
 Namnikode tuna am kingsano.

9

"Anga nang'ni kurio, seke kimgni,
 Bolchu a'ding salakkim, nape chakgni
 Kato rama dingsasan kataina,
 Tuo ama kingsasan tusina,
 Dombing a'kol donenga do'sek sa'kal,
 Ama angko donanga seke kimkal"
 Da'nang Chujong Racha
 Amjaha ka'tong rakna mikchaa.
 Chanchi ha jaka rinokbalbal,
 Ku'ranga daka ka'srokbalbal.
 Sikaha chae rim'na gitik-gitik
 Da'nang ! rim'e kimna gitikgitik.

10

Indioba inaha, an'tangna !
 " Nangja altue kambe onna,
 Ramramaride be'gongdipna.
 Chanchiaha jea dakna,
 Dakmihaha chakate katna,
 Noe Giting tap chakate,
 Inaha ka'saa-ka saa gipake.
 " Angara mande ong'ja nang'na mo ?
 Ku'sa ku'ongija re'na mo ?
 Mia ku'sa cha'gija katna mo ?
 Asongkuboda chamea, na'ara :
 Na'ara, Dongara, Namara."
 Gaakaha mikchi gragra,
 Jalengotaiaha sakgnirara.

11

Da'nang grapaha Racha,
 Gipakari dongaha uaba,
 Ku'dimaha, changjaha watnaba.
 Ong'aha jumang jamang,
 Dakaha mikwang pewang,
 Aganaha ku'wang nawang,
 " Angni Noe Giting na'a,
 Nang'nan anga ka'saa.
 Nang'kon chame rogni,
 Mani kale dongni,
 Ripeng-baju, kawa kagni.
 Indioba, chamene da'oa
 Mimako midong, pote re'bakuja,
 Namako rengsi sike sokbakuja.
 Chiga knidingarioba,

**A'song wakkidamarioba ;
 Angko angse inakode,
 Kawa chame channakode ;
 Re'ba bilsisanamangmangde
 Chingchi, mani-sari rokaude,
 Angna ka'sachongmota inode."**

12

**Uamangni indake ka'sako
 Parakgrikengo namnika mikchaako;
 Knaenga me'tra-pante mesaako,
 Doke - dam'e katchaako :
 " Dimdim-dimchong dadichong
 Dama dokato ;
 Nomil-pante mesana
 An'ching wangalo ;
 Dama bangsi sikato
 An'ching mesana."
 Aiao ! Dakaha dimik-dimak,
 Aganaha mikmik-makmak :
 Pil'e Chujong Noeko salbake,
 Changsa ku'dimtaiaba gipake.
 "Knaboda. Daldi, pante-me'tra
 Nokman' Sa'roa me'sara ;
 Dama, bangsi sikata.
 Haibamo, chingaba re'e nipana,
 Gana-kotip gane nipana,
 Pante-me'tra an'senge ropana."**

13

Chujongko watatna Giting
 Okamataha jongtang Rongtambing.
 Aganaha rimangchina, chalangko,
 Nomil-pante an'sengchina, bipako.
 Da'nangsonga gipin changija,
 Jawa, Nomil pante ingija,
 Chrok-mesaaha, kiratcha'gija.
 Jawa songni pante injaengjok,
 Wai ! Nomil sikbeke derengjok.
 "Askirong kimberong nabaengjok,
 Nama pante mikchirong sokbaengjok ;
 Jaktong sona gitchiko de'nane ?
 Kiting binbinjariko nongnane ?
 Da'a walde sengama, sengjama ?
 Do'bimako cha'ama, cha'jama ?
 Kawa kana chakama chakjama ?"

14

Inomiting Noc Giting
 Rimateaha ma'a paa,
 Chra mongting, Agila mamasa,
 Wa'ge-jat'ing, Mebila adasa.
 Aganaha, Chujongko Rachako
 Rime-sale ra'echina jaktong gichakko ;
 Do'o bikik nie on'china,
 Do'sie-do'doke donchina.
 Re'angaha mana-ada,
 Timeaha wanga-paa;
 Nokmagipani nokchina
 Ri'me, sale de'e ra'bana.

Chujongko okama dakjok maiabana,
 Nokman noksamchina, ri'me ra'bana.
 Sokbaanikon rim'jok chagrime,
 Topgrime dongjok changgrime.
 Chujong uiana, maia ong'aha,
 Aktettet-biltetteta dake niaha.
 Indioba, jinma uchia toksan,
 Krengoba manjaha, ichia saksan.
 Dongsoenga songni mandesal,
 Do'bik nina Tuara mikasal,
 Aganatjok, "Dede-ra'ra;
 Do'a manggitam ra'ba, ra;
 Chua dikgittam de'ba ra,
 Do'rekgipuko, gisikwatgipako
 Doksotataha doktingkogipako.
 Ki'sangbuko rate, bibikko ote,
 Bibik jora niaha adita betbete;
 Agana dakjok: "Do'bikde nama;
 Donga a'a-chia, noka jama,
 Mia-misia tangka-sona;
 Donga bang'a jila-ala,
 Pattia; tom'toma, dea-su'a."

16

Da'nang! Chujong Racha
 Kimna-dongna gongja dakaha.
 Inaha Nocko walsni tudilchina,
 Mama-adako salsni dongdihina,
 Gongjachongmotode, cha'senge nichina.
 Wala-walsni tudiloba,
 Sala-salsni cha diloda
 Gongtelja dakaha, Chujong Rachaba,
 Katanga dakaha, jaktong gitchakba.
 Da'nang! Tira Noe Giting
 Chanchaha Sera-puna dingding.
 Rikangna cha'ngna katanggimin,
 Sokena-man'ena ka sagimin.

17

Am'anggan matchu chara katako,
 Rikanggan Chalang jora papako.
 At : nagandeko jakbita gita,
 Songa jawa dakako mesoka gita;
 Kattakon olginok, solakon chakginak,
 Kinasalde re'ginok aminsalde sokginok.
 Re'angaha Tira Noe Giting
 Rimbite jontang Rongtambing
 Biri dingsagipachina;
 Gittim damsagipachana;
 Balsengna, cha'sengna,
 Kawatangna, chametangna.

18

Rangra-Misi, Nio-sari
 Rimchaksoha ka'sariri :
 "Mani chame sokbara,
 Nio sari re'bara ;
 Balsaldee koko kekapatna
 Am'e bite rengsi rengapatna ;
 Ta'ma noksik donako ge'na,
 Mima a'ba gerako gamna.
 Angni sing'kim chakana,
 Angni dede Rachana"

19

Girapari inaha Gitting :
 "Mama, inakode inbojok,
 Mari, solnakode solbojok.
 Namana bachi re'angkuna,
 Dongana bachi am'angkuna.
 Mikkang daknangpa'jaoba,
 Bimang ninanpa'jaoba ;
 Mika mikkiwekoba,
 An'gil purawekoba ;
 Wagam wakengsioba ;
 Mikgron mikkelsioba ;
 Re bajok kattakon olna.
 Nabajok solakon chakna.
 Gro-arsel boknabe, manine
 Indinari watnabe, chamane."

20

Mamatangna we'bara,
 Manitangna ra'bara ;
 Bitchi chin'o man'ako,
 Setti so'o ching'ako ;
 We'e-ruc on'a;
 "Ha, mama chigittang
 Ra'baa nang'na ma'noktang.
 Simil-sichak dakjaoba,
 Oko-ka'o nangjaoba;
 Ringe nibo mamaba,
 Tape nibo maniba,
 Angni ehame, Rachaba."

21

Aganangkuaha Noe Giting,
 An'tangni chanchia dingding:
 "Angni Chujong Rachako,
 Raka jaktong gitcchakko
 Do'bik nimanjok, Tue kal'manjok;
 Songa mande mikasal
 Sakki Tuara mandesal.
 Chinga kawa kamanjok,
 Sese-papa dakmanjok.
 Re'bara bilsisamangmangnasa,
 Chong'mot ka'sara mesoknasa
 Ang' chamena Rachana,
 Ang' Namana, Dongana
 Enia manina, mamana.

Bilsisade rogni-donggni,
 Ama gita gamgni rim'gni.
 A'ni galmak nangana,
 Be'en manggisimana,
 Salni korang rakana;
 Kenja sakgisimana.
 Gamaigni, gana riking cham·pile;
 Su'aigni, jaksi gota nangpile.
 Ja'si gadapman'oba
 Rim'a sala potnabe,
 De'o, salo nangoba
 Doka indakesa sata inabe."
 Sokmechokchok mesoke, on'e
 Chamesako a'bao rim'a ;
 Ja'ping srongbokbokko ane
 Seko-pako borango man a.

— 0 —

94 DO·AWANG

1

Mochu a'chu kimbrio,
A'ding bolchu kambeo.
Mikoronga Do'awang :
A...wang ! O! A ..wang !
Ama sagi ina, "wai ! Do'awang ;
Mikoengane, Do'angwangne."
Kenmana an'tesreng-sreng,
Chakatpila kimil bo'seng bo'seng.

2

Gombol am'pak pingrue,
Chakmana kene. dongnue
Aganronga, "Saoba sitainakaha,
Saniba skoko cha'tainakaha,
Iade, skal Do'awangde "
Manderangni bebera'a gita,
Siaba sibeberonga ina
Mcchu a'gitoko mikoatbebeode.

3

Do'rengpani depante,
Misi Do'reng Pante ;
Mingaha bikon Kabera pante.
Uijaenba Bamin songgitchamo
A'ba o'manaha Dolja-a'gitoko,
Napak songchina me'mang ramako.
Donga a'ba borang, a'te dake,
Unon rangkguri nokpante rike.

4

Kabera panten' wanggipaba,
 Alime Dingsimen' segipaba ;
 Abri a'patsagipao a'ba
 Tuengachim wakma skalna uaba.
 Mibol wagam wamisi chamiting,
 Abong kni pitsuru minmiting.
 Kabera wakmangganchina,
 Tutimenga a'ba Aragondina.

5

A'ba borang pang'sangsang,
 Tua alang kang'jangjang
 Misi Do'reng pantede,
 Rangguri nokpante dake,
 Salatenga wa'kap-kapkap,
 Dokatenga wa'tak-tak-tak.
 Andalsisi jani jabitchimo,
 Chudapsiko jamani wal'timo.

6

Ka'bera panten' ma'detang.
 Nike okamangaha detang.
 "Wai! Angkode Abet-Rengge-
 Dudu-Ja'srang rimangengane.
 Re'angengaha Napak songchina
 Angade ; atchiramasachina.
 A'ba tuenggipa nang' awangna
 Aganatpabone Gaeripa-Nawangna."

7

Indakesa Alime Dingsime
 Dongengachim sina noko an'jime.
 Bini janggi-jamade skangan
 Re'angsoaha uko senggijan
 Janggide ba'ra boteptepe,
 Pakkolo re'jak siksepsepe.
 Kaberan' rangguri nokpanteko
 Rejak srak nangatangana soneka.

8

Bri ga'rurongchenggipa gita
 Sillang guli tom'chenggipa gita
 Bilangako, katangako nikrikesa,
 Ge'etangako, tikkongangako man'rikesa;
 Okamwatwatjok ina, "A...wang !
 Kai ! Adede siangengjokkai !
 A...wang ! Adede katangengjokai !
 O ! A...wang ! O A ..wang ! A...wang!"

9

Untalsa Kabera panten' dedrang,
 Misi Do'reng Panten' su'drang ;
 Me'mang a'song cholramao,
 A'chik songanti cholbibrao ;
 Dongtekenga ina jamsirenge,
 Rangguri nokpante rike ;
 Aganattimna pilak manderangna
 Sianggipan' noksul, ma'drangrangna.

Songrango Do'awang mikokeugna,
 Ina mande signiko uiatkuenga
 Wanggipako okame aganatkuenga
 "A...wang! Kai! sani-de! sanisa!
 Brangbaengjok! sretbaengjok!
 A ..wang! kai! san' matchu! san ' mande!
 Katbaengjok! Re'baengjok!
 A...wang! O! ...A...wang!
 A...wang! O! .. wang!
 A...wang!"

—o—

94 MISI RINGRING PANTEKO SING'A

1

Dongmiting Ja'kora songitcham gittim,
 Ga'suram Warima dare ontimtim;
 Niwatran kasi bibal balaka boksogim,
 Dilma an'cheng pakako sipojim;
 Noka-jama baljoka balsrangrang,
 Gittim sa'ra an'senga chijangjang.
 Misi Do'me Baljagring, dongram a'saare,
 An'sengbea a'song-chiga songsaare.
 Songa rangguri nokpante grimrao,
 Songdu-tading niwatram a'churao;
 Wekwak-jiljal, pradimbira a'dinga
 Songa-noka Sra-tira ka'dinga.

2

Bilsi me'gong halo, chimo-wano,
 Misi Dom'e Baljagring songo nao;
 Naa gana re'king paltaktak gane,
 Soka nokma jaksan ko'dapdap gane;
 Riksrang ja'chok gitchak jrewakwak
 Konar gitok rikgitok bokrakrak;
 Nade nabal te'tintin gane,
 Klnitomko te'tintin tom'e.
 Songa gipin nomilde sokjana,
 Misi sakni me'chikba batjana;
 Dakaiana okgila te'mina-mina,
 Nikaiana petenga jalik mina-mina.

3

Soka, 'biri dingsagipaoni pante,
 Misi Ringring pante, dambe.
 Wano, nomil-pante balsalo.
 Nokma gittim sarao mesao;
 Kambe too tarime ong'a, Ringring,
 Jakpa doko Susime chika waching
 Misi Ringring Panteko, dambeko
 Sing'jok Misi Do'me Baljagring do'mako
 "Nokma wangalanasa sokbaama, na'ara,
 Chalang ajoranasa sretbaama, Namara
 Na'an ang' chame, seke kuri kimnane,
 Bolchu a'ding salakkim ja'nengtaknane."

Nomil pante jrakjrak sa'ra saatbingbingo,
 Jajong rimit-rimat aram balbringbringo;
 Dimchang do'mesal gita bimang ting'get-ting'get,
 Do'ka manggisim gita gana ching'chet-ching'chet.
 Sko choknok-choknok an'seng mesatoka,
 Ku'rang rinok-rinok aje-chametoka.

"Deng dadi dimita.

Nomil ja'teng rimita.

Chengchap, chengchap

Panterangni ki sangchi

Nomil teng'chap-teng'chap ;

Mesaa nomil-pante mitap mitap.

Dimu rippang sko mejek-mejek,

Chambil akang ki'ting gongget-gongget."

Misi Do'me Baljagring,

Misi Ringring Pante

Ku'rang ringmanggirime roangjok,

Jaksi kongkanterime sokangjok ;

Ja'si ga'depdepe rim'ang-salangjok,

Dama go'ol nangate, roang.sokangjok,

Jaktong sona gitchiko de'angjok

Ki'ting binbinjariko nongangjok.

Chametang ka'saangmanjok,

Dongatang mikchaangmanjok.

Nokma wana matchoto,
 Rama' Biri ku'choto ;
 Songa an'seng niwato,
 Nomil pante jolwato ;
 Danang ! Misi Ringring Panteko
 Watnapja ka'saa ka'pak-ka'pak,
 Re'napja mikchi ipak-ipak.
 Aiao ! Misi Do'me Baljagring
 Gisik ra'a, Misi Pante Ringring.
 Game cha'gimin gita, cha'napja salo,
 Rike tugimin gita, tunapja walo.
 Aganjokna chalanko, bipako ;
 Manengjokna pako, Galjapako :
 "Apa choligijara, sio sininggijara.
 Mikgron nikdo nangama, na'ara ?
 Dea saksa dongakon, nio ninapbeakon.
 Ja'ping srongbokbok dongakon,
 Sokmechokchok roakon.
 Nomilsilsil dakakon namnikbeakon ;
 Angara me'tra badi roginok
 Da'oa randi badi dongginok.
 An'tang amanggijakoba nikjawa
 Gri sokchitangkoba am'jawa ,
 Re'angjama apa re'rokgijara
 Am'angjama sio sininggijara.
 'Biri dingsagipao nang' gri-sakchi dambe
 Gittim damsagipao Misi Ringring Pante
 Dongaba Kambe too tarima Ringring,
 Jakpa doko Susime chika waching.

Inasa ohra-pante, boning mosa gimikan
 Te'gisim anggal so'aona manchie,
 Jagital jatengrakaona kapsae;
 Ba'a ba'anggiako chi'a chi'anggiako,
 Demechikko mikkang palma lne,
 Mikgilko kilokchi done;
 Atte nagandeako jakbita gita,
 Songa jawa dakako paraka gita;
 Gri-sokchi bi'amna, jonga-gri niamna
 'Biri dingsagipaona, gittim damsagipaona
 Galjapa re'tariangjok sala-jaa sokjoko
 Mama-ada ku'monge, nangrime,
 Chra-pante salgome, mogome;
 Gando makkal te'rakrak gane,
 Kotip samal bakjakjak kae,
 Dokra am'beng teng'kapkap kee
 Milam jako te'rakrak de'e,
 Jako sepi paltaktak lae,
 Matchu chara gitchakko moe.

Songa chiring ga'batangmano,
 Rong dol rama reangmitingo,
 Mite-Rong'dan sokangmangmango;
 Kai! Brapong goata gita,
 Chipu-Gam jakpong, jakreng gita:
 Rama mikkang malsotanga
 A'dare chiringkolchana.
 "Wai! Na'ade chipu Gamde,
 Tampi rongrang chi'ade,
 Suesama, Samesama?

Maiako nikesa malchanga,
 Maia a'sel botesa peng'panga ?"
 Rama wa'nok gongako srang
 Jako milam ra'achi
 Den'ari, srang tapsrang ;
 Rikonangjok dare chiringkolchina.
 Wa'pang wa'sneng dikao napako,
 Wenwen penpan koltiko chakako ;
 Su'e, doke galangjok,
 Sko sote donangjok ;
 "A'ba rama nama,
 Katta bima ke'a ; "
 Ka'ding aganangmajokna
 Galjapa, Chalang Rontaba.

8

Songa delang kimjimko nikato,
 Sara a'mang gitchakko niwato ;
 Dolatoa, Dolja a'gitoko
 Durimong niwatramo, niniramo
 Ja'nengtake roangjok.
 Misal cha'e re'angjok.
 Songma grogroko,
 Gittim sa'ra pattalko
 Chadik-ga'dikangon ;
 Achak bao sing'sojok,
 Bi'sa pra-dimbra chae nisojok.
 Galjapa jako milam ra'ako chopjole
 Matchu chara moako dongdike :
 "Wal'jepamang nokchana
 Rama bako dakaba,
 Biap bano dongaba ;
 Songa Ka'sinengama, gittim baljokengama ?

Songa-noka, jangki do'ga namtokengama ? "
Sing'ahana Galjapa Chalangba.
Mesoka gita re'angpajok ja'rik-snilaipaba.

9

Saliramchi gitchak gitchak dikka so'chakangengo,
A'brichi rakkual a'bokana rong'kuchakangengo ;
Wal'japani, sa'ra delang kimjimna
Sokchametokaha sokgipa spojimba
Wal'jema mamatang Galjapako niksoe,
Galjama, manitangko sing'soe ;
Rimangaha do'gacholo niuatgija,
Sonepango chadengdikatgija ;
Du'un mejarena, pakma do'degongna,
Mamatang ga'tiktike, grimrako napangjok,
Jalurako re'angjok.
Pakma do'degongo sepi dop onesa
Milama sret potatoesa
Jako jaksil ganako okesa
Am'pok Chram kuruo asongjok
Nokdokrao spojim gadongjok.

10

Segipa Wal'jepako noksul roako ;
Bakbak re'bachina aganatjok uko
Indakesa mamako, adako,
Songo-noko mande dakako
Aganatjok;
" Du'un Mejareo tugipa mama re'baa,
Pakma Bo'degongo rogipa ada sokbaa
Wakbi'sako rim'reke ra'babo,
Do'bisako koksepo chipbabo,
Togijako kadepe ra'babo,

Chagijako moméke chekbabo."
 Unosa Songma Chram gittimni
 Sispa-napsa jonga-gria
 Bitchi chin'o man'ako tikkolo we'bae,
 Setti so'o ching'ako pongmao ra'bae ;
 "Mainasa nabara mamara ?
 Cha'a maiko cha'nasa ?
 Ringa maiko ringnasa ?
 Ha, mama ma'noktang simil simchak dakjaoba
 Ha, mani chigittang oko ka'o nangjaoba,
 Gitok masijaoba, ka'bak sosijaoba
 Ha, mama srang ring'bo,
 Ha, mani gittang cha'bo."
 Inetokana, roetokana.

11

Kartong dongsiksakari Misi Do'me Baljagring
 Mikron nisiksakari am'enga Misi Pante Ringring.
 Indioba, Rangguri nokpanteesa
 Kretchae, roa dakaijok panteskarang baksasa.
 Du'uang ! Misi Do'me Baljagring
 Nomil silsil matdingchik,
 Kokcheng bi'sa kokgutok ra'e,
 Raumako jaktango de'e ;
 Manitangko injok sing'e ;
 "Mani, chiga ringa bachiba
 Chidareba badiba ?
 Chiga rama namama, namja ?
 A'song chiga seng'ama, seng'ja ?
 Abet Rengge donggenkon ?
 Mite Nating rogenkon ? "

"Aia ! Nade manide
 Mainasa k'algalenagade ?
 Donbo, na'a mani, donbo."
 Baljagring beng'a kanga rajana
 Raumako chipana,
 Chidare rama mesoke inaha ;
 "Songtangni bi'sakode,
 Noktangni mandekode ;
 Da'odipet Abetba Renggeba kal'jachim
 Miteba-Natingba dokjachim.
 Songgipinni mandede,
 Kenna nangbebeade ;
 Be'entangko niroke re'angbone,
 Bimantangko simsake do'angbone.
 Ia noksa'rako, ia noknatengko
 re'angaibo manine."
 Chidare rama talako nie,
 Mite chengkna niwate ;
 Chiringga gam'a dingding'
 Chidare teng'a dingding
 Re'ange man'angaha
 Songa nomil ting-riting.
 Chidare man'eaha
 Chana pongmasni ritingriting,
 Raumao chiko koe,
 Kokkarengko cheng'tap ole.
 Re'baaiaha nokchana
 Nomil bang'ana, kratcha'ana.

Adi waltingangosa,
 Song'a-chana man'osa;
 "Mama misi awek engbojok
 Song'a ki'wek cha'bojok,
 Song'a nama namjaoba,
 Bigong bijak tojaoba
 Lutariko nanggenma?
 Alikako cha'genma?"
 Sokgipa rikkim-rikkim
 Cha'gipa rittim rittim;
 Jaka jaksualmano,
 Cha'spako galmano;
 Srang dimpang ringmane,
 Gittang bildang cha'mane;
 A'ba rama wena srongdimdim,
 Katta bima pe'na rikkim-rikkim
 Nokbihongna gadojok,
 Nokgachina re'bajok.

"Mainasa re'bara Mosara?
 Jumang nika gita,
 Salna wata gita;
 A'sel maiba sokama, Gro-ajak dongama?
 Duribolko songnama, durimongko ge'ongnama?
 Jong-grikosa am'ama, Gri-sokchikosa bi'ama?
 Nokna a'kim ganama, Atte mongreng niama?"
 Injokna Wal'jepa,
 Mama-ada dakaba,
 Chra-angde gimikba.

"Aia ! Boning mosadrang,
 Mama ada dakgiparang
 A'sel mamingba dongja
 Gro ajakba dakja.
 Da'alde roba-re-bamanchaa
 Mikilko kilokchi donmanchae
 Atte nagandeako jakbita gita
 Songo jawa dakako paraka gita,
 Angdena, Dome Baljagringnan
 Jonga gri niamnan,
 Gri sokchi bi'amnan,
 Misi Ringring pentenan.
 Kanga - bila dongama ?
 Changa penga gnangma ?
 An'tang amangjanan
 Gari - sokchi am'achim,
 Atte achokanan
 Atte mongreng bi'achim."

"Aia ! Mama mainasa kanggni,
 Chingara mainasa bil'gni,
 Maninanba, chamenanba ba'a chia
 Depanteko mamani nokapna
 Adani kigongnan.
 Indiba mai namanasa
 Moangnakenga, salangrakonga.
 Rike tugipa ong'ja Miside
 Game cha'gipa ong'ja Ringringde
 Ninasa bipa a'keao matatja
 Inasa chara ikgilao gam'atja.

Cholioba, cholijaoba,
 Choldakoba, choldakjaoba
 Grong dangkepoba
 Mikkang gajepoba
 Re'angode moangbo,
 Amangode salangbo ;
 Na'simangsajok "
 Aganatjok nokmagipa,
 Namchikgipa, Wal'jemaba.

17

Unon mamatang jakpa, wanjepa
 Misi Ringring panteko, gritangko
 Kingatjok, sing'atjok uaba.
 "Sa'ra a'nasoso nang' mama-adarang
 Asongenga rikkimsreng manderang ;
 Bal'ekeba aganjaenga,
 Sningeba janapjaenga ;
 Chanchiesa aganbo
 Sko rokrekreknabe
 Jakpa gangjipjipnabe.
 Knajokma Misi, jarara.
 Nang' mama Galjapa re bara
 An'tang nokapna ki'gongna
 Nang'ko, rimangnasana
 Nokbichongna, nokbikromna.
 Nang' manina, nang' chamena ;
 Durubolko songna.
 Narangko dongtimchina,
 Kampilna rorikchina ;
 Wa'se, bare be'ako on'jotja.
 Am'pang-sone go'oko sikjotja
 Mamani ja'tengko galrikna,

Adani grengko borikna :
 Mani rorikchina, buchi kal'rikchina.
 Re'gnima, re'jama ; gonggnima gong'jama ?
 A'song baljoknikenama ?
 Chame seng'panikanama ?
 Aganatboda, kusa ku'onatboda."

18

Misi Ringrong pante
 Nokni turima'o kratchae,
 A'chi banbripe.
 Jaksi perikkope
 Jaja-jiji dakengon
 Mamatang Galjapa aganattaiaha :
 "Angade jong'erianan nabaa,
 Angni gri-sokchinar re'baa ;
 Sko rokrekrekoba angnin,
 Jakpa gangjipjipoba angnin ;
 Ame daknangjaoba nangnin,
 Chame chanangjaoba nangnin
 Nangnan rim'bara, nangnan dir'bara.
 Su'a kolsa su'arakjanan
 Ko'a rongsa ko'arakjanan
 Nang' kuri salakkimko am'a,
 Nang' saljagring salbareko nanga.
 Noka-jama dakjaoba,
 Dippleng, lau-susi dongjaoba,
 Malamgipa, jeljaoba ;
 A'a kamsajaoba matchu mangsajaoba ;
 Dikkong ko'saba, boltong tongsaba nangnin
 Dikka suriba, chitok suriba nangnin.
 Ga'chakna jama dongjaoba,
 Salchakna noka salakimjaoba

Bangbango rochina,
Salrako dongchina
Rimenga, salenga
An'tang amangjanan. an'tang man'angjanan."

19

Aiao ! Mani namako jekunama,
Anga chame namaka galkunama ?
Anganba a'ba te'mina gita dakpaja,
Salni teng'sua gita ong'paja
Mikkang nitoakosa nie dongnama
Kni ro'akosa sim'e chan'ama?
Su'pa, song'pajokode ong'a'jok,
A'ba gampajokode chu'ong'jok.
Game cha'arakjaoba, rike dongrakjaoba
Sa'ra samsi dikanasa rimengajokona.
Nokgil sawil weanasa mong'engajokora.
Mamani ku'bako jena amama
Manini ka'sako galna man'ama?
Kambe too tarime ong'ode re'gnok,
Jakpa doko Susime chikode dongginok."
Indakesa Nokpanteni panteko paga ra'e sa'lona
Amasongni chengchengko rua ra'e deu'pea.

20

Aia! Misi Ringring parteko
Moanga, salangani salo,
Songa Chram gittim ka'sinrikana
Pante-disa songa sinterikana;
Songa nomil bimasdrang,
Chame nang'a ke'adrang;
Ka'a amriktokjana,
Cha'a cha'tokpiljana,

Saa daktokpilana.
Da'nang! Ma'nokrang watata.
Do'mako ku'dime-ku'chote;
Mimako midong pote,
Namako rengsi sike;
Koksi kongapate,
Rengsi renggapate;
Janggi-jamana rong'chi-silehi,
Kang'karena atte gitchi,
Jakgitokna milam silchi,
Gisik, ra'na, kadena mikchi.

21

Tiprikja mikgron mikka mikchi,
Aganata ku'rang bija bitchi.
"Ang' dede Racha, na'ara
Angni chi'a Do'mara, Mamatangna ba'ara,
Do'ma gita bilangbo, bipa gita re'angbo
Apane, Do'mane."
Ma'gipani Mikchimitingo, ka'a amjamitingo
Abitangba, Wal'jeba,
Jongko jako rim'tate,
Mikgron mikchi usite,
Aganatjok biaba;
"Angni jejong, Do'mara,
Manina, chamena ba'ara,
Nokbichongni bipara.
Duribolna songara;
Nokdang ba'ku dakari,
A'ba baku gamari,
Jikko songo kimari
Dongbone, Do'mane;
Gro a'jak botnabe.
A'sel dake ra'nabe.

Mamako mande ming'e,
Maniko chame ine,
Boning-mosa chane;
Re'angbojok jojonga,
Jojonga, Do'mara,"
Pil'e ma'gipa, Mamatang Galjapana
Ka'siksikari aganattaiaha:
"Misia, chengcheng boldambepite,
Chanchia gis:k atorapiti;
Kasinesa pikangbo,
Namekaisa ra'angbo, mam'ne.
Uchide nang'ni gisiksajok,
Da'ode nang'ni ku'siksajok :
Salna sikrepnaba donga,
Mikkana sojrongnaba donga.
Skiesa aganbo,
Aganesa dakangbo.
Name delkoppabone dedeko,
Name niropkabone, Do'mako.
O'sapsape galnabe, bipako
Den'sapsape kal'nabe, Chalangko."

22

Da'o mamatang Galjapaba,
Ka'dimeate injok biaba.
"Na'songni mam', anga donga,
Da'a kalima, da'a kenmana.
Anga donga, bobil dokgomgipa
Mama donga, deltik tinggomgipa;
Salna re'supak kagipa,
Mikkana talakjak inggipa
Cheksi salkujaoba ;
Bijak jelkujaoba ;
Sala-jaa rakoba siatjawa,

Mikka chima waoba soatjawa.
Da'a morim, da'a kentim.
Anga donga!"

23

Da'nang! Misi Do'me Baljagring
Aganpanan man'jajok,
Ka'siksike dongajok.
Unon manitanggipa Wal'jema
Depanteko ku'dime, ku'chote ;
Do'mena do'mako pakwate, jakwate ;
Au-au! Grapari aganjok ;
"Mani, ang' Durimong Giting
Iakai nang'ni Do'ma, Chara
Salgita teng'jaoba nang'na ba'ara,
Sona gita ching'jaoba nang'ni Do'mara.
Nang'ni Dosik sonako ra'angbo,
Nang'ni matchu Charako moangbo."

24

Da'o Misi Ringring Panteko
Merong rongjanggi jakkipate,
Jako milam jakbitate ;
Kotip samalko kaate,
Gando, makkalko ganate ;
Nokoniko watatjok,
Songoniko jolwatjok.
Da'nang! ma'na nona ka'sae,
Songna- nokna ka'pake
Mikchi onangaha,
Au girapangaha.
Pil'e songadingko domane
A'brini ku'choto neng'take,

Rongpatalo gakate, niwate ;
 Ma'na ka'saatean mikchi rongsa galtaijok,
 Songna ka'pakatean ku'rang ku'sa saltaijok.
 Unon Misi Do'ma Baljagring
 Gipake, ku'dime,
 Mikehi soling solangko ipake ;
 "Da'a grapa na'ara
 Angni Apra, Do'mara ;
 Chingoba gittim rotobeaba,
 Songa an'sengbeaba ;
 Chiringga rongtalpara grikgangjang,
 Gittim balwa nangpara balstrangrang.
 Ha ! Srag balstrang ringatbo
 Ha ! Gittang tokang cha'atbo."

25

Da'o unoni re'chakatange
 Sala do'bret kisango,
 Dikmeattam chaunapo ;
 Man'eaha a'songtang, chigatang
 Ja'kora songa gittim
 Ga'suram Warima dare ontimtim.
 Unon a'song chiga nadikeoa,
 Langket chiring ga'dikeoa ;
 Misi Do'me Baljagring inejok.
 "Janjokai chingni a'song-chiga:
 Pante auram chiringga ;
 Jawa mande a'song garam,
 Abet, Na'ting, Chisik, Biring roram."

Indake agana tapan
 Misi Do'me teng'krangkrang,
 A'bokwatataha kasuangsuang.
 "Go !.....
 Je nabanankgipaba
 Gol'dik su'tiktike dongpaku,
 Je sokbanakgipaba
 Ja'ko ga'tiktike sengpaku
 Chinga ja'su jaksupaengane,
 Chinga au-miksupaengane "
 Da'o Misi Ringring Panteko,
 An'tang sona do'sikko ;
 Rong'masamo asongate
 Kotip samal kaako pooke gale,
 Gando makkal ganako engpoke done
 Kawatangko chisatchimdape,
 Aganjok miteko okamwate.
 " Wai ! Abeta - Renggea,
 Chisika, Biringa,
 Mitea Natinga
 Kinapakuboda !
 Ia gipin songa bipa
 Angni Dongajokne,
 Ia jawa gittim chara
 Angni kawajokne ;
 Noknian mandeaha,
 Songnian bipaaha.
 Kinaengama ?
 Nachil raknabejok,
 Tamon daknabejok ;
 Kalakpanabejok,

**Jaktipanabejok.
Aganpaja inabe,
Jasappaja inabe."**

27

**Indake a'song bewal gita,
Mitena janapman'oa,
Mandena aganmanoa;
Misi Ringring Panteba;
"Aia! Na'ade nomilde
Dakbebealake, kal'bebealake."
Inenba bak chaari
Misi Do'me Baljagringni
Chinpakrako kikgale gale,
Gana re'king enggale done,
Aujok chiringa koltiko
Chiring wari ka'tiko.
Jaksi kongkanterimesa,
Wari ang'ke niangesa,
Chiring na'chi rim'angesa;
Chameko songna gaatanga,
Kawako nokna ra'gatanga.**

— o —

96 PANTE BALEK

1

Pante balek,
Grong dangkep,
Mikkang gajep ;
Bilbang napmiriaia,
Pakma nigitoaia.
Songa me'mang mango,
Gittim gro dako ;
Waka rattimaia,
Do'a so'timaja,
Pura wektimaia,

2

Pante balek,
Nateng rokrek,
Nio mikchep ;
Ja'ku riktimaia,
katta ra'timaia.
Songa nomildrangko,
Gittim bimadrangko ;
E'sal matchok nachilna,
Am'bol do'reng ja'sina
Nadil-redilaia.

3

Pante balek,
Sko kimkatek,
Bimang do'pinchep.
Gittim saram cha'o
Ka'dingna mande daka,
Asongna sa'am sol'a.
Chu sim'ramo roa,
Dikka salwilwala,
Jenti bawilwala.
Pongma rim'timaia.

4

Pante balek,
Katta betbet,
Me'chik dangdep ;
Bima wanbimao,
Songa saram cha'o,
Nokma ta'gong chimo ;
Noksik andalachi,
Me'chik melaramchi ;
Bima rodilaia,
Hoho balaalaia.

Pante balek,
 Ku'chil simtek,
 Noksik napket ;
 Bobil soka salo,
 Gnal naan salo,
 Kena, sia nopo ;
 Matchu gita
 Pegitchinge wata,
 Achak gita
 Kime kom'e kata.

—o —

97 TIRA MIKASAL

!

Nama Tira Mikasal,
 Miksik tanga, mandesal;
 Nia 'tangna do mesal;
 Pring gore gol'gatgipako;
 Attam muga miktogipako;
 Bimang kalkambe gnangkosa,
 Mikkang mi rasong nikakosa.

2

Songa nomil matdingchik,
 Donga mikkang, cholon, gisik,
 Uan seng'manchaa, me'chik.
 Nia kang'kare gong'kalako,
 Am'a jakgitok rakkalako;
 Krong kimde songe rikgipakosa,
 Wa'se wa'ge sue, angipakosa.

3

Tira chasong didongni,
 Tro ja'chongni;
 Uan, duramong-ranimong.
 Am'a du'un mejareo rogipako,
 Pakma do'degongo asonggipako;
 Am'pok chrau kuruni redokrakosa.
 Rogipa nokdolrao, jakrikrakosa.

4

Chichaako gitdokkal batrimna,
 A'jiriko skosim jilrimna,
 Bri minsinggipako re'rimna.
 Sepi chelo ra'gipakosa
 Milam pako gatgipakosa;
 Sea, grong a'mang nangakosa.
 Chamena, samte kime ba'akosa.

—o—

98 Bipa

1

Bipa :

A'kim Gitel Racha,
Nokma sa'gre chara.
Sokkilte nangbaanin,
Merang mitubaanin;
Kilkok de'susabara,
Mata pari nibara,
Spi-milam de'bara.

2

Bipa :

Mikkang Salgira
Ka'tong janera;
Kalkambe gnan,
Mirasong gnan.
Roba'a' nokdokrao,
Dulun mejareo,
Pakma do'degongo.

3

Bipa :

Jaktong kimde krong,
Bimang silchirong.
Janggil niam ramgimal,
Mikka bitchi ringgimal.
Ma'na a'king man'gipa,
Nona nokja rikgipa,
Bangbol ja'rim dangipa.

4

Bipa :

Bolma a'chang do.mesal,
Gisik mikta mikkasal.
Bima wanbima'ao,
Bilsi me'gong balao;
Songa nomil rodila,
Gittim pante bildila,
Hoho didi balsala.

5

Bipa :

Goera Chalang,
Chara-silang.
Notangdikan salo,
Mako amo ramo;
Sara deepgijade,
'Kinte bnekgijade
watja bide' Bipade.

6

Bipa :

An'chi do'me pota,
Bobil a'jak soka;
Milam sildam cha'oba,
Sepi rema cham'oba;
Sara delang kapile,
A'mang gitckak dappile
Dinga Bipaska Bipa.

—o—

99 MADEN' JAKMA

1

Jekai bol jakruronga,
Apsan manden' bimang ;
Ga'ake soruronga,
Dapahaon a'mang.

2

Nitogipa bibal
Bala salsanasan,
Apsan madeni sal
Chasongsanasan.

3

Bibal ga'akoba
Bipang dongrikkua,
Mande siangoba
Jakma tangrikkua.

—o—

100 ON·TI ON·TI

1

Pelsa, pelsa ; ritchasa
Ong'a tangka gong'sa ;
On'ti, on'ti dakesa
Ong'a jakma mingsa.

2

Rongsa, rongsa chimonge ;
Bangbol ja'rim dana ;
Salni salna skie
Gisik, silchi sika.

3

Rittak, toktak chitoktak
Ro'ongkon cham·pilata ;
Jotap su'dap jaktaktak
Raka bikipilata.

— o —

KU·BIMIKRANG



A

A'an-a'kinsindik : Tom·tomgipa, ka·singipa
a'song.

A·bawea : A·bachí re'a, ba a'a gama.

Abet-Rengge-Dudu-Ja'srang : Sawaka mite.

A·bim : Tom·betgipa a'gilsak.

A·bima : Da'oni Bangladesh jeo skango Sune
Mune, A chik Durimong enia A'chik-
rang dongachim.

A·chura : Chugipa' a'bri ku'chot.

A'danggipa : A'a gamgipa.

A'dinga : Jikjaka, ilila ba grapa.

Aema-Ditema : Tom·dagipa chi (Sagal)

Aeroktak Wachitoktak : Mikka-obimani mite;
gipin mikkani miteko
Nore-Chire-Kimre-
Bokre minga.

Aganmitapa : Katta dongnue agana.

A'gim-Gonggim-Mrong-Sindim : Mongma.

Alasia : Aratmisia, aratgitchaka

Alna : Cha'ani

A'mik salmik : A'sak gimik andala, ba sik-
dikdik daka.

Amiteng-asiljeng : A'gilsak.

Amrik : Nareng, Te'tol.

An'dila : Be'en moe kena, ba sin'a.

An'dil-morim : Kenjagoke be'en moa.

An-te-sreng : Be'en chikjrimpile an'sriksrik
kena.

An'jimjima : Sae, ba kene be'en moa.

A'sak-jumang : Tusia ba jumango nikgipa
a'gilsák.

A'sata : A'a ran'gipa ba namgipa biap.

Atchiramasachi : Salgi, ba siani nalsachi
donggipa biap.

B

Ba'bra : Ba'gipa-chilgip, Dakgip-rugipa, Patti-
gipa-ra'rongipa, jringjrotoni jringjrot-
onagipa, pilakongipa (Isol)

Balgala : Chugimik bibaloi balgaoa.

Balwa a'jakra rakdapa : A'sel ong'a ba soka.

Bandasal : Neng'takram noktop.

Be'en nangrimgrik : Jikkim-sedonga.

Be'gongdipja : Bamja nomja.

Bel'bela : Gamchatgija katta agana.

Bidom : Bilmiting matburing.

Bimrim : Bijak bijimgipa bol ba a'bri simdim-
dim.

Bika-rongt'e : Kadonggipa, karakgipa ba bilak-
wa'sagipa mande.

Bila sokja-ka'a amja : Bilsokgija daka.

Bisongsa : Umangsa.

Bol'bola : Bel'bela.

Bolchongdikoni : Ma'chongoni.

Bo'ola : Katta agana.

C

- Chabiboldrang :** Chadamberang.
Chadeng dekdak : Chadengrakgija moa.
Cha'gipa.donggipa : Man'ne cha'gipa.
Chama : Suale on'a.
Chambilking : Chambil bite.
Chambugong : A'bimani songjinma jekon da'o
 Bangladesho Shambugone ine
 minga.
Chame : Mikchagipa ba namnikgipa mande.
Changkichon : Jangtong ba kang'kare.
Chata : Gamchata.
Cheksike : Te'sape bite nanga.
Challingga : Bija-bisring.
Chigimaatja : Chiga watja ba bon'atja.
Chlan chi rongdik : Chidipo ba chiwari.
Chi'indikdik : Sikdikdik.
Chirang-chisakoniko : Ripinge, chimonge don-
 aoniko.
Chiringga : Chi ringram biap.
Cholbibra : Rama bidimol.
Chramongting-wa'ge ja'ting : Mama-ada jakpa.

D

- Dakstapa :** Ka'nila ba krengstapa.
Daldi : Chametang. (Darling)
Damik-a'we-Kimrang-pattal : Garo Hills.
De'mesagipa-gistikwatgipa : Dorekgipu.
Den'skanggipa : O'e-den'a pechenggipa,
 re'chenggipa.
Dinbaa : Ra'bae on'a.

Dinga : Bobilko warachaka.
Dingdinga : Bi'sa rodila ba aldu-mittanga.
Dingchika : Bimchipa.
Dingsika : Warachaka.
Do'biknia : Do'o bibikko nie me'a mechik
jora ongama ong ja niani
Do'gaola-sel'uchaka : Samo, -mongmao gima
mama-ada bobilsana.
Dokam : Rikgitok.
Dokboka : Cha'poke togie ra'a.
Dokra bimikoniko : Janggina jamana ripping-
giminoniko..
Doksamea : Chabokeye ra'a.
Doktepa : Kasaako mesoka doktopa.
Doktingkogipa : Dorekgipu.
Donga : Ka'sagimin Ripeng. (Darling)
Dongsiksaka : Dongtomgija rotomgija daka.
Diplok-doga gita : Dalgipa mamalsa diplok.
Do'reng gaka'sia : Do'reng mikoa.
Dosi-dodoka : A'chikrangni bewal gita jikkim
sedonga.
Do'tekmea : Dal'na silna changgija mekonchek
changa.

E

Enia : Nangrimatgipa katta. (Aro)
 Enikoa : Iani jamano
 Engtoja : Dakto ka'togija onga.

G

Ga-brongtango : Gandiltango.
 Gale katanga : Sie bon e re'anga.
 Gamu : Jakma.
 Gangbinga : Gaora daka.
 Ganggua matchok : Ganggu dal-gipa.
 Ge'song gebota : Ge'a, ba ge'songa.
 Gildengsia : Gilkolama.
 Gilmarik : Bigil tarigipa ba juta tarigipa.
 Gisik a'ning bita : Niksenggipa ba uigipa
 mande.
 Gitil songchala : Asong-chadengrakhija ga'aka.
 Gotokenga : Balgaoenga.
 Gittoa : Ong'nasia

H

Hiwao! : Cheaniko inchroani.

1

Inchagni : aganajokona

J

Jabol : Choligija on'g'a.
 Jakma : Jakchi daka.
 Jakpea : Bilbeata.
 Jakrani jakko rim'grika : Jikkim sedonga
 Jaksi chika : Kratcha'a.
 Jani : Gipinni.
 Jasia : Bi'gija indin on'ata.
 Jripjrang-sringsrang : Sikdikdik daka.

K

Ka ! : Grikani katta, ba ra'bia.
 Ka'a amja bilasokja : Síkoba bilsokja.
 Ka'ko-doke-sko-rim'e : Kalima.
 Kalkabonga : Cha'e ringe dakjinmaa.
 Kalkame : Rasong nakkim.
 Kambeongija : Bimgja daka.
 Kawate-ku'dikila : Agamatango a sel nange ra'a.
 Kena sikrim : Kena napa.
 Kerang : Kok.
 Kilding jakbo gita : Gonggongsing sringa.
 Kima : Roongko ba bolko mande sol'a.
 Kimbriona : Chubatgipa biapona.
 Knasingsanga : Ontiminti knaa.
 Kinge-sike : Bilchi jakchi warachaka.
 Kingkot : Jetjetari daka.
 Kni dinggita : Antal rongtalgija dakata.
 Ki'sang medop kaa : Ki'sang chimitpile asonga.
 Koksintika : Dilneng diltike rakkia.
 Krita : Do'bisa wakbisachi amua.
 Kuanga : agana.

L

Luttari : Kari.

M

Ma'ate : Krakra dake, name nitoe, dong-
 rongbewalgita, dakbewalgita.
 Mandesal : Gisik gnanggipa mande.
 Manganga : Saa-siachi re'a, ba mangona
 mangtataona re'a.

Mangkimaata : Bon'ata, ba gimaata.

Mangona : Sigimin manggisiko so e mangkrip
gopa.

Ma'ringa : Duk ong'e sintechae donga.

Matbring : Buringo donggipa matburingrang.

Matcha elbikbika : Matcha rana ba mikoa.

Matgrik : Bilakgipa, wa'sagipa, dakgrikragipa,
cherakgipa mande.

Me'dikku : Chougipa me dik.

Mejekbaa : Agansningbaa.

Menggoki dindapa : Namgijako donua, ba
pindape dona.

Me'tra grangchakchak : Kimku-rokugijagipa
metra.

Midong pota : Midongko tom'gimik skoo pota.

Mikandalao : Uisokjao, tusina wikchipang-
mijingo

Mikasal : Gisik gnanggipa mande

Mikchimikchac : Seng'na andalsimitingc.

Mikgilgri : Kratcha'ninggija.

Mikil jamgop pina : Mikgil dita.

Mikilsia : Kratchaa

Mikitok : Mikgri.

Mikgronguri boldimjok : Mikchi ong'a.

Mima nojima : Mima simulgipa (Jaha)

Mini mijareram : Mi misini biap.

Mittanga : Aldua.

N

Na'chil songa : Knatima.

Napak a song : Rongrang e nia Rongjeng
gisepgrikogipa a'king (Memang
a'song)

Nengrachok : Aratgipa
Nikjagringa : Niksrapa.
Nirok-niktokaigipa : pilakkon nikgipa Ba'bra.
Nokpang : Nokdongkama.

O

Oko-ka'o nangjaoba : Tonikjaoba.
Onchokgniko : Napramko.

P

Pakchaata : Gisik nangata.
Pakkre chikgrika : Bilchi jakchi dakgrika.
Pante ajakajak : Jik bimkugijagipa pante.
Pra dimbra : Bi'sa jinmadrang.
Pringprang niwatgipa : pringprang aski.
pura pua : Purako sate Mitena mandena
balchaksoa.
Pura tom'grika : Chelchakgrika.

R

Ra'drue : Ra'rone.
Randi : Segri ros.
Rangguri nokpante : A'ba borang.
Rangkop : Kopgrikna mangipa silni donchakani.
Rangpia : Satpegrika.
Rang'sita bilanga : Sianga.
Rasong sia : Mikgil be'a.
Rema gita jabinga : Kumong nangrime donga
Rengsi sika : Kadima ba Stitgrika.
Ri'il : Chingchet chingchet rong.

Ripinga : Chimonga.

Rong'anggal : Ong'telaigipa a'ningal unggal
(Kalla)

Runa : Gimatna daka.

S

Sa'am : Asongchakani.

Sa'gre dimbra : Chadambeni tok.

Salgira : Salni mite.

Salgra : Salni mite.

Sanggra : Dakgrikdiligipa dumarong.

Salmadrang : Salgimik.

Salmanchia : Saldonsoa.

Salmangsia Salko jako minge sao on'na.

Salsiata : Salreata.

Se'endok : Wajaring.

Sel'u chaka : Bobil dinga.

Sr'indikdik : Kasinjrimjrim.

Sillang : Ro'ong.

Singsingkol : Tugipa rongkol.

Simil-simchakdakjaoba : Similjaoba.

Sko rima : Kalima.

Sniloa : Jak on'oa.

Sokkanchi : Chini mitim.

Solkande : Manengchina.

Solna : Matnange aganna.

Songga-songpanga : Songdong a'char.

Songgimaatja : Songnok galja.

Stil rongmisi ondapa : A'sel soka.

Suirong : Sui bite.

Susime : Jajong mite.

T

Tangka : sa-ra roram : Tangkani biap.
Tengte : Ja-bikpil mande buring.
Tengrip : Salni napanga.
Tikkela : Kanilstapa.
Tikkonga : Geeta ba didia.
Tikwaria : Biltanggita daka.
Toktakrang : Chini tingtotrang.
Toptopa : Ka-sae doktoptopa.

Torea : Grika ba rabia.
Totmare-kingmare : Kangalni mite mechik.
Trimanga : Tangonanga.
Tuatna a'an ka-bako : Gopna.
Turuang ; Tubegipa silang dare.

U

Uranium : Rakbatsranggipa silgrak.

W

Wachaa : Chana ba dakna sikroroa.
Wakki gongita : Antalgija donga.
Waku wareng jakMiting : Bil rakmiting.
Walkitik : Wal-janggi. (Electricity)
Wangala : Mimisi akmamo misiko mitejani.
 (Harvest festival)
Wapang gita pangkae : Kumong nangrime
 donga.

